

中  
州  
金  
石  
記

中州金石記卷三

唐下

中大夫上柱國鄂州刺史盧府君神道碑

天寶元年二月立李邕撰并行書在洛陽許家營

撰人年月缺諦視口州字亦不了寶刻類編有鄂州刺史盧

府君碑云李邕撰并書天寶元年二月立在洛宰相世系表

正道鄂州刺史碑云除洛州新安宰以犯諱更滎陽今滎陽

又有景龍元年盧正道勅及滎陽令盧公清德文据此諸証

知卽正道碑也碑云祖諱寶素隨晉州別駕考諱安口緜州

長史考宰相世系表有盧寶素隋澤州內史部長晉州別駕

子安壽緜州長史正與碑合下一格子正紀汝州司馬其上

一 格與安壽並列者正道鄂州刺史蓋世系表十三上二十  
七葉誤以正道移上一格遂致父子亂次賴有碑以考正之  
也世系表安志當是安壽弟正勤正義正言當是正紀正道  
兄弟僂當是仇弟推其名字相似知之今皆上一格後之刊  
此書者幸改正之二十六葉亦誤上一格惟二十九葉有正  
容與正紀正道並列不誤

玉真公主受道靈壇祥應記

天寶二年立道士蔡瑋撰元丹邱正誓在濟源靈都宮

碑文摩滅多不可辨有云公主法号無上真字元元按新唐  
書列傳云玉真公主字持盈始封崇昌縣主俄進號上清元  
都大洞三景師與碑所稱無上元元之號不合豈公主又自  
加道號歟史稱公主薨寶應時而世俗傳靈都宮爲公主昇

仙之處志家載之可謂大愚矣金石略又有蕭誠書云英公  
主受道祥應記亦當在此今不可得也

嵩陽觀聖德感應頌

天寶三載二月立李林甫撰裴迴題額徐浩隸書在登封嵩  
陽宮遺址

寶刻類編有此碑記元宗命道士孫太沖設醮燒丹之事通  
鑑云天寶四載上謂宰相曰朕比以甲子日於宮中爲壇爲  
百姓祈福朕自草黃素置案上俄飛升天聞空中語云聖壽  
延長又朕於嵩山鍊藥成亦置壇上及夜左右欲收之又聞  
空中語云藥未須收此自守護達曙乃收之太子諸王宰相  
皆上表賀蓋是時元宗好道甚矣新唐書地理志河南有伊  
水石堰天寶十載尹裴迴置迴方爲河南尹故題額也司空

圖書屏記稱浩或草或隸尤爲精絕墨池編稱浩善正書八分真行今觀其隸書甚工致與正書信爲二絕也

張尊師探元遺烈碑

天寶三年六月立蔡瑋撰韓贇行書在濟源

碑云先生諱探元字體微家世南陽正一真人道陵師君之胄按三國志列傳云張魯沛國豐人也祖父陵客蜀學道鶴鳴山中造作道書以惑百姓而此碑及道書昇元經等通謂陵爲道陵未知何意元世述張道陵家世甚詳不知唐時已有正一封號矣碑又稱家世南陽亦與史言豐人不合又述玉真公主於陽臺下構館曰大洞三景法師却與新唐書玉真公主傳合又述公主馨散湯沐首事增脩探元亦以恩賜口裘器服資營繕之事云惜乎厥功未口而寡然體逝是其

徒傷其卒而述其道行之文也

嵩山大德淨藏禪師身塔銘

天寶五載十月立行書在登封

碑云大師諱藏俗姓儼濟陰郡人儼字未詳當爲郝異文又云攀慕教緣奢花雨淚暮則慕之誤奢花二字未詳也又偈云無言可論當以爲聆字玉篇聆力丁切衍也非此義廣韻論於音相次庶幾近之

冥濟瀆序

天寶六年十二月立達奚珣撰薛希昌隸書鄭琚撰後序在濟源

朱長文墨池編有此碑其文與字甚工金籀琳瑯所未載但得其碑陰之遊記而已濟瀆在縣西三里有池周七百步其

西一池周與之等而中通焉卽濟水所聚其源自王屋天壇山顛伏流百里至此復見東南合流至溫縣入河禹貢云導兗水東流爲濟北山經王屋之山灑水出焉而西北流注於秦澤地里志兗作沅水經注灑作聯此濟瀆實當名沅水至溫縣入河乃名爲濟字當作沅後人于此呼之甚乖經典矣

### 游濟瀆記

達奚珣撰立薛希昌隸書在宴濟瀆序碑陰

文甚似六朝字亦唐隸之至工者與都穆金籠琳琅對校有云不以險阻斲其勢都穆不識斲字而云闕一字今此字甚完好說文斲斷也从斤斷艸譚長說斲縮文折从艸在久中久寒故折足証唐人猶能用古字都穆又誤以軹縣西北數十里爲南北遠而見奇爲貌奇四時壹色爲一色敝岸宿冷

爲危岸庶託豪翰爲庶記賴有原刻証之

少林寺靈運禪師功德塔碑

天寶九年四月立崔琪撰僧勤口行書在登封

文云上人諱靈運蕭姓蘭陵人按蘭陵東海縣此當稱南蘭陵則省文古人有之金石文字記云碑頂有字云寺西石塔靈運禪師墳卽梁帝皇嗣者也黃叔璥中州金石考云陰陀羅尼經咒高岑書按岑唐嵩山隱士

永泰寺石幢

天寶九載八月立正書在登封本寺殿中

未有施主清河張趙并妻彭城劉氏云云下多漫滅

某尊師碑

天寶十年二月立口口撰翟灝行書在濟源靈都觀



碑多摩滅乃其徒因尊師旣卒頌揚道行之詞獨缺其姓名  
有云祖皇隨任洛州司戶參軍祖楚皇任戶州上庸縣丞亦  
不能考其人也中述玉真公主於仙人臺下建立山居之事  
蓋亦與尊師並時入道也未云以七月七日遷於尚書谷之  
東阜是其葬處碑側有字數行末題太和五年辛亥二月三  
日壬申山人胡遊記

### 永泰寺碑頌

天寶十一載閏三月立釋靖彰撰荀望正書在登封永泰寺  
朱長文墨池編有此碑碑略云寺創自後魏正光二載孝文  
帝之妹入道爲尼及神龍二載僧道瑩奏爲永泰公主於前  
件故伽藍置寺一所請以永泰爲名觀荀望正書結體茂密不  
減蘇靈芝而真書名何也

少林寺還天王師子記

天寶十四載八月立正書在登封少林寺

碑載久視元年僧義獎等狀及武后口勅顧炎武始見之  
會善寺戒壇勅牒

大歷二年十一月立正書在登封

朱長文墨池編有此碑碑分二格上層載元載杜鴻漸王縉  
等奏準牒文下層載釋乘如上表劉昫唐書王縉傳云縉與  
杜鴻漸捨財造寺無限極初代宗喜祠祀未甚重佛而元載  
杜鴻漸與縉喜飯僧徒代宗嘗問以福業報應事載等因而  
啟奏代宗由是奉之過當深述其弊又云故大歷刑政日以  
凌遲有由然也又云其傷教之源始于縉也今此奏牒正是  
作俑之証劉昫良史防微杜漸之言豈不信而有徵哉

張禪師義琬墓志

大歷三年二月立正書在洛陽乾元寺東壁

碑述中書令汾陽郡王郭公表義琬禪行素高勅賜謚號大演禪師和字作昧以艸體爲楷書也

大證禪師碑銘

大歷四年三月立王縉撰徐浩正書在登封嵩嶽寺後

禪師號曇真姓邊陳留開封人大歷二年賜號大證禪師文苑英華載此碑其文尚可攷年月据寶刻類編今摩滅也述書賦注稱縉爲文筆泉藪是時縉捨財造寺之弊甚矣唐代宗尊重二氏至沙門道士死而賜官賜謚誠可嗤笑碑列縉銜云太清太微宮使崇元宏文館大學士上柱國齊國公劉昫書止云太微宮使其崇元作崇賢無齊國公封號皆當以

碑爲正

裴遵慶神道碑

大歷十一年二月立楊綰撰盧曉隸書并篆額在洛陽

寶刻類編有右僕射裴遵慶碑云楊綰撰盧曉隸書大歷十一年二月立在洛今碑缺年月及書撰人名知卽是也碑記遵慶歷官詳于本傳云以門蔭授興寧陵丞系遷大理丞外口轉司勳吏部郎丁內艱去職免喪以太守外口至德初口口賊庭將趨行在故太尉清賀於朝遽拜給事中累遷尚書右丞兵部戶部口校吏部口郎黃門侍郎平章事就加金紫光祿食一百戶口口太子少傅口口吏部尚書遷右僕射并領口口云云皆與史不甚異遵慶有二子向會宰相世系表云向吏部尚書會都官郎中

容州都督元結表墓碑

大歷口年十月立顏真卿撰并正書在魯山學官

其文與新唐書本傳略同宋祁當卽据此爲之惟碑云祖利  
貞史云祖亨字利貞碑云充山南東道節度參謀史作西道  
碑云猗玕洞史作猗玕沮碑云將家讓濱史作讓濱蓋傳寫  
之誤李義山作元結文集後序云見憎於第五琦元載故其  
將兵不得受作官不至達母老不得盡其養母喪不得終其  
哀碑獨不述其事者以同時忌諱而新唐書則應採錄此事  
乃僅襲碑文何也碑云葬君子魯山青嶺泉波原今在縣城  
北三十里青嶺俗名青條嶺也金石錄云按唐書列傳結後  
魏常山王道十五世孫而碑與元氏家錄序云十二世蓋史  
之誤又碑與元和姓纂皆云結高祖名善禕而家錄作善諦

未知孰是

碑文云

缺

唐故容州都督兼御史中丞本管經略使元君表

墓碑銘并序金紫光祿大夫行湖州刺史上柱國魯郡開國

公顏真卿撰并書嗚呼可惜哉元君君諱結字次山皇家忠

烈義激文武之直清臣也蓋後魏昭成皇帝孫曰常山王遵

之十二代孫自遵七葉王公相繼著在博史高祖善禕皇朝

尚書都官郎中常山郡公曾祖仁基朝散大夫褒信今襲常

山公祖利貞雀王府叅軍隨鎮改襄州父延祖清靜恬儉歷

魏成主簿延唐丞思閑輒目引去以魯縣商餘山多靈藥遂

家焉及終門人諡曰太先生寶應元年追贈左贊善大夫君

聰悟宏達倜儻而不羈十七

缺

書乃受學于宗兄先生德秀

嘗著說楚賦三篇中行子蘇源剛駭之曰子居今而

缺

真淳

之語難哉然世自淺浮何傷元子天寶十二載舉進士作文

編禮部侍郎陽浚曰缺第汙元子耳有司得元子是賴遂登

高科及羯古首亂逃難于倚玕洞因招集鄰里缺餘家奔襄

陽元宗異而徵之值君移居讓溪乃寢軋元二季李光弼拒

史思缺陽肅宗欲幸河東聞君有謀略虛懷台問君悉陳兵

勢獻時議三篇缺大悅缺卿果破朕憂遂停乃拜君右金吾

兵曹攝監察御史充山南東道節度叅謀缺仍於唐鄧缺蔡

等州招緝義軍山柵高冕等率五千餘人一時歸附大壓賊

境於是缺侵前是泌南戰士積骨者君悉收瘞刻石立表命

之曰哀業將吏缺剛挫銳不敢缺降威望日崇時張瑾救安

勸於襄州遣使請罪君為缺不勇勵缺將張遠帆缺羸等

缺軍屬缺超拜至此時論榮之屬道士缺秦芝誣湖南都督被

決救推官嚴郢坐流俾君按覆君建嗣承鼎無缺仲昇為賊

所掄裴莪缺遠近危懼莫缺晏然今上登極缺使留後者例

加封邑缺作郎遂家于武昌之樊口著自釋以見意其略曰

少習靜缺難于猗玕洞著猗玕子三篇將家讓濱乃自稱浪

士著浪說缺湯為官乎遂見呼為湯郎著湯記七篇及家樊

上渙者戲謂之聲寔以缺又以君湯浪於人間或謂湯寔歲

餘上以君居貧起家為道州刺史缺賊所陷人十無一戶纔

滿千君下車行古人之政二季閒歸者萬餘家賊亦懷缺敢

來犯既受代百姓詣闕請立生祠仍乞再留觀察使奏謀第

一轉容府都督兼缺本管經略使仍請禮部侍郎張謂作甘

棠嶺以美之容府自艱虞以來所管皆固拒缺君單車入洞

親自喻撫六旬而收復八州丁東郡太夫人憂百姓詣使請

入

中州雜記卷三



留大歷四年缺四月拜左金吾衛將軍兼御史中丞本管使

如故君矢死陳乞者再三優詔哀許缺季春正月朝京師上

深禮重方加位秩不幸遇疾中使臨問者相望夏四月庚午

薨于永崇坊之旅館春秋五十朝野震悼焉二子以方以明

能世其業名雖著而宦未立以其季冬十一月壬寅虞葬君

于魯山青嶺泉陂原禮也嗚呼君其心古其行古其言古躬

缺是三者而見重於今雖擁旄麾幢摠戎於五嶺之下弭綸

秉憲對越於九天之上不爲不遇然以君之才之德之美竟

不得專征方面登翼太階而感激者不能不爲之太息也君

雅好山水間有勝絕未嘗不枉路登覽而銘贊之感中行見

知之恩及匹至今分宅以恤其子其不缺此類中書舍人楊

炎常袞皆作碑誌以抒君之德業故吏大歷令劉袞缺江華

令盟令問故將張滿趙溫張協王進與等感念恩舊者送器  
以終葬竭資鬻石額垂美以述誠真卿不敏嘗忝次山風義  
之末尚存肅往敢廢無媿之辭銘曰次山斌斌王之蓋巨義  
烈剛勁忠和儉勤炳文華國孔武寧屯率性直方秉心真淳  
見危不缺臨難遺缺德今之古人奈何清賢貴志莫申羣士  
立表垂聲不泯

### 大岷山銘

建中三年四月立洪經綸正書在潯縣

銘云登于大岷禽所經過頂凸坤儀根壓淇河天生忠良濟  
物宏多山靈河神俾環海戢戈後云唐建中元年四月廿一  
日勅魏博成德幽州等道黜陟使諫議大夫洪經綸題按洪  
經綸劉昫唐書有傳大岷山當在汜水此潯縣黎山唐人誤

指爲之也攷水經注引鄭康成注尙書大伾云地喉也沈出  
在際矣然則大伾在河內修武武德之界濟沈之水與滎播  
澤出入自此書正義引張揖云成皐縣山也水經注云河水  
東逕成皐大伾下伾北卽濟沈之故瀆矣成皐縣之故城在  
伾上滎帶伾阜絕岸峻周高四十許丈据鄭張酈三君之說  
則大伾當在今汜水縣西北漢成皐故城之所在也山在河  
南鄭從河北言之則云在修武武德之界謂修武東武德西  
也武德卽今武陟亦謂成皐之山是真古說而唐人多以爲  
在濬縣者本于臣瓚書疏引漢書音義有臣瓚者以爲修武  
武德無此山也成皐縣山又不一成今黎陽縣山臨河豈不  
是大伾乎瓚言爲然括地志元和郡縣志亦從瓚說予原瓚  
意誤以大伾在河北而修武武德間無大山故以濬縣之山

當之不知成阜自有大伾且山祇一成本非峻嶺水經注引  
爾雅許叔重曰忱等並以爲一成惟今本說文及偽孔書傳  
以爲再成王光祿鳴盛以爲李陽冰輩改從爲凡之謬正與  
予意合伾字甚俗正文當爲坯尙書借依史記借邱皆古人  
假音字耳此作伾从山釋文尙書音義亦云伾本作伾又云  
字作伾蓋唐人既誤以濟縣大山當之乃造爲从山从阜之  
字可笑也予嘗過古成阜登陟坡陀縣崖周阻特無石壁乃  
悟古人制字命名一成爲坯坯字从土之義碑云俞所經過  
當是禹字汗簡作帛卽帛字變文也凸字出萬洪字苑廣韻  
云凸出兒在充字下知卽凸字之誤說文凸不順忽出也下  
从倒子正凸出之義充籀文凸字

大伾山銘功碑

貞元二年五月立李沛撰陳口卿行書在濬縣

碑爲平李希烈銘功之詞劉昫唐書德宗本紀云興元元年十一月癸卯宋亳節度使劉洽與曲環破希烈之衆於陳州俘斬三萬級生擒賊將翟崇暉以獻戊午劉洽大破希烈之衆擒其僞相鄭贄等五人以獻希烈遁歸蔡州汴州平碑所云大都統檢校司空同中書門下平章事懷德郡王汴宋節度劉公卽洽也碑又云二年之四月回賊口變霜刃口發身分蔡下首懸臺街又云五月有詔會大梁洪班口賞勞以還師卽指李希烈爲其牙將陳仙奇所殺并誅其妻子仙奇以淮西歸順之事亦與史合

鴻臚少卿張敬說墓志

貞元十年九月立薛長儒撰正書在洛陽

碑云芝於漚澗之陽邱山之新塋蓋以鴻臚少卿爲河南尹  
裴請命爲押衙卒而葬于洛陽也

嵩山會善寺戒壇記

貞元十一年七月立陸長源撰郢隸書并篆額在登封大歷  
勅牒碑陰

寶刻類編及朱長文墨池編俱有此碑碑云漢晉間有高僧  
植貝多于西峯一年生花因爲浮圖按太平寰宇記引嵩高  
山記云漢有道士從外國將貝多子來於嵩岳西脚下種之  
并立浮圖今有四樹與衆木有異一年花白色其香甚佳與  
碑云高僧不合蓋傳聞異詞也陸長源新唐書有傳陸郢見  
陶宗儀書史會要稱其善書

濟瀆北海壇祭器襍物銘并陰

貞元十三年立張洗撰隸書在濟源

集古錄有此碑明都穆金齋琳琅亦載其文而遺其碑陰又遺器物名數題在碣之陰也十字第一行北海壇二所脫二所兩字偃華口儒上闕一字以爲闕二字及以沁河爲池河以俟後賢爲以待皆賴有原刻証之碑陰有云沾二者卽沾有云柒盒子柒杓子者柒本漆字艸書後人又變爲正字故山海經漆木或作柒也

彭玉傳徐浩神道碑

貞元十五年十一月立張武撰子峴正書并篆額在偃師學宮

碑云除襄州刺史加本州防禦使賜金印紫綬及京師失守翠輦西巡成都公請行在所口申書舍人集賢殿學士時鸞

輿未復鶴詔急宜允資倚馬之能多類奮鞭之速公虔恭法  
口咫尺天顏口管風生落賤泉灑又云以本官兼尚書右丞  
封會稽縣開國口是浩自襄陽防禦使遇安祿山之難遂從  
明皇在蜀授尚書右丞新舊唐書既遺浩趨行在之事舊書  
則云安祿山反出爲襄陽太守本郡防禦使賜以金紫之服  
誤以安祿山反在浩爲防禦之前又云肅宗悅其能加兼尚  
書右丞亦誤以元宗爲肅宗矣碑又言當時以陷賊衣冠正  
名同惡百辟會議三司定刑其徒三千將寘重典公延諍三  
進竟獲減論是浩當時救陷賊官有力與李峴議同此實不  
朽之事史俱不載何也浩墓在偃師故碑云葬于東都偃師  
縣先塋之左今移碑至學懼其日久遂致迷失也寶刻類編  
云彭王傅徐浩碑張式撰次子峴正書并篆額表姪張平叔



題識貞元十五年十一月立在洛今缺峴名墨池編稱徐峴  
善書工行草石曼卿得其石刻屢稱於人其書信有父風

軒轅鑄鼎原銘

貞元十七年正月立王顏撰袁滋籀書在闕鄉

碑見廣川書跋其字甚少又寫轅爲輶地爲坵得爲得氣爲  
龠衍爲衍墳爲墳升爲陞秦爲秦皆別字按从車之字不當  
爲車地从也不當从它龠字不知所据管子輕重戊戌戲作  
造六壘以迎陰陽汗簡長部有鹵云氣字出淮南王上升記  
俱似此龠字疑有譌謬然不知其正文何若也行从水不當  
从彡墳从冎不當从山从冎此字音拱升俗作陞秦从肅不當从  
肅肅秦字所從又碑云南華經曰寫曰爲目則刊者之誤云失德  
乙仁說文乙云古文及秦刻石及如此乙非籀文而滋以爲

籀書觀其餘文字亦未能合籀書之載在說文者甚多滋作小篆尙多別體安能知籀乎乃劉昫唐書良吏傳稱袁滋工籀書雅有古法蓋耳食之言矣碑刻于貞元十七年滋爲華州刺史兼御史中丞劉昫書稱拜尚書右丞知吏選事出爲華州刺史兼御史中丞潼關防禦使鎮國軍使在貞元十九年來年夏不知何也

軒轅鑄鼎原銘碑陰

貞元十七年二月立正書

廣川書跋以爲韋諷書今摩滅碑分三格上層銘并序釋文中層王顏進玉石佩表草下層錄事參軍裴□等題名其表草略云湖城縣界有鑄鼎原縣有昇仙宮寺臣令口於原上最高處刻石表之因於原上選地對穿穿深四尺得玉石口

口口是一片穿時爲土工所折今作四段有縣珮孔子二微  
臣測度恐是黃帝上昇之時微臣遺墜之物云云按史記封  
禪書申公曰黃帝采首山銅鑄鼎於荆山下鼎旣成有龍垂  
胡髯下迎黃帝上騎羣臣後宮上者七十餘人龍乃上去餘  
小臣不得上乃悉持龍髯龍髯拔墮黃帝之弓百姓仰望黃  
帝旣上天乃抱其弓與胡髯號故後世因名其處曰鼎湖其  
弓曰烏號魏土地記云宏農湖縣有軒轅黃帝登仙處元和  
郡縣志云湖城縣荆山在縣南卽黃帝鑄鼎之處今閩鄉卽  
漢湖縣地故荆山在焉也

張詵夫人樊氏墓志

永貞元年十月立釋至咸撰正書在洛陽

碑爲沙門所撰因其長女出家寧刹寺或受戒于沙門也唐

世重釋氏風俗之無禮如此後有般若波羅心經真言揭諦作羯諦釋氏之書有音無字固無不可假借爲之云葬於平樂鄉朱陽原亦洛陽古鄉名以好佚爲好述異文以宦爲宦俗字

朝請大夫鄭府君碑

隸書在洛陽許家營東十里許家莊

其文摩滅可辨者惟帝識尙書之履及魏郡通守口之孫數處黃叔璠中州金石攷云元和二年韓皋撰不知何据趙上舍魏云碑文一曰婉順貞和又曰淑德曰貞柔銘曰魚軒雉服應是新鄭郡君鄭氏碑也趙君仁和人攷古之學近無其匹

寶叔向碑

元和三年十月立羊士諤撰姪易直正書在偃師

金石錄有此碑金石略有竇易直書左拾遺竇叔向碑羊士

諤撰未詳卽此其字摩滅棄在牛王廟作供几近始移置學

宮其文之可辨者云有唐左拾遺贈使持節舒州諸軍事舒

州刺史扶風竇公洎夫人汝南袁氏繼室贈臨汝太君口元

和二年秋八月十七口口啟殯自丹陽郡覆金山克葬於河

南之偃師按叔向墓在今縣西二十里蔡莊保韓愈撰國子

司業竇牟墓志銘云葬河南偃師先公尙書之兆次牟卽叔

向子也碑又云西河郡公口代祖紹左武衛大將軍改封在

平公高祖善衡口慶口郡下缺三字在平烈考允同昌口司馬

又云口夫人有子曰常殿中侍口口內供奉賜緋魚袋湖南

郡團練判口次曰牟下缺又云繼室口臨汝太君有子曰羣御

史中丞賜紫金魚袋次曰庠殿中侍御史內供奉鎮海

下曰

鞏下按宰相世系表竇武之後有敬遠封西河公居扶風平

陵孫善衡則碑云西河郡公者卽敬遠也世系表不載紹當

是敬遠之子子叔向爲四代祖也韓愈贊牟墓志亦無紹可

援碑以補竇氏譜系之缺世系表叔向祖懷直洪州都督龔

公今碑缺此一代其子曰常曰牟曰鞏曰庠曰鞏俱見劉昫

唐書及世系表而官爵與表傳皆異可以參考易直穆敬時

相劉昫唐書有傳碑稱第十一姪表誤上一格與叔向並列

宜改正羊士諤者柳宗元楊評事集序云秦山人墨池編稱

其與韓梓材同在越州亦以文翰稱

辛祕題名

元和十二年閏五月刻正書在登封少林寺

其文右行題云元和十二年閏五月廿九日河南尹辛祕奉  
勅祭中岳散齋于此寺攷文苑英華牛僧孺撰昭義軍節度  
使辛公神道碑云祕字常之元和皇帝初元年高選刺史公  
出爲湖州云云出爲常州刺史升取河南尹朱長文墨池編  
有此題名云在香山寺今在少林寺靈運禪師碑側埋入土  
中假師進士武君億搜得之手拓以歸葉封等俱所未見

狀嵩高靈勝詩

太和三年六月立尉遲汾撰正書在登封嵩嶽廟壁

詩有注引道書仙經世說等皆出初學記唐之詩人守此獮  
祭也末有熙寧丁巳大梁王紳題字云獲是石于圮墻之下  
移置壁間汾名見劉昫唐書張仲方傳云李吉甫卒太常定  
吉甫謚謚爲恭懿博士尉遲汾請爲敬憲韓愈與祠部陸員

外書稱尉遲汾出羣之材觀此知昌黎所賞爲不虛矣

東郡懷古詩刻

李德裕撰太和四年六月立隸書在滑縣

朱長文墨池編有此詩刻劉昫唐書李德裕傳云太和三年八月召爲兵部侍郎裴度薦以爲相而吏部侍郎李宗閔有中之助是月拜平章事懼德裕大用九月檢校禮部尙書爲鄭滑節度使今碑以太和四年立其自署云義成軍節度使銀青光祿大夫檢校戶部尙書兼滑州刺史御史大夫正與史合懷古詩二首亦見全唐詩王京兆名尊漢東郡太守楊給事名瓚宋濮陽太守元和郡縣志云白馬縣河侯祠在縣南一里漢王尊爲東郡太守河水盛浸瓠子隄尊臨河不去後人嘉尊壯節因爲立祠今詩云登城見遺廟卽其祠也



顏延年有陽給事誅在昭明文選序云永初之末佐守滑臺  
李善引東郡圖經曰滑臺城卽鄭之廩延元和郡縣志云滑  
州城卽古滑臺城相傳云衛靈公所築小城昔滑氏爲壘後  
人增以爲城甚高峻堅險臨河亦有臺今詩云徘徊望故壘  
卽其地也河侯祠在今滑縣南一里滑臺當卽縣治德裕有  
書名李商隱會昌一品集序稱爲隸法道媚金石錄亦有德  
裕隸書平泉草木記山居詩今不傳

### 尊勝陀羅尼幢

太和八年三月立呂受撰正書在滑縣  
經并有序

### 尊勝陀羅尼幢

會昌二年九月立僧契元正書在新野

字方二寸許

重刻顏真卿宋州官吏八關齋會報德記

大中五年正月立崔倬敘在歸德南門亭內

寶刻類編有此碑云顏真卿撰并書田悅篆額大歷七年立  
大中五年崔倬補書在應天此宋州官吏因田神功疾愈爲  
作齋會也劉昫唐書田神功傳云忠朴幹勇當時所稱而明  
趙崑以神功非良臣徐向等媚其主帥非佳事責魯公爲撰  
爲書蓋以小節掩大功古人不如是矣碑後有刺史崔倬敘  
石幢事略云會昌中有詔大除佛寺至于碑幢銘鏤贊述之  
類亦皆毀折瘞藏之此州開元寺先有太師魯國顏公以郡  
守僚吏州人等爲田氏八關齋會鐫紀大幢時刺史邑宰遂  
鑿鑿缺敗以仆之蓋口口僅存委埋于土倬於前刺史唐氏

之家得其模石本遂命攻追口口殘補緝其次大中五年正月一日敘則此碑毀于會昌刻于大中者也倬實重刻而非補書寶刻類編蓋誤倬見宰相世系表隋義同鄜城公榮四世之孫所書有太和六年四月裴度撰文宣王廟記在襄州見寶刻類編

篆額云唐宋口口州刺史徐向及官吏奉爲汴宋節度觀察使右僕射信都王八關齊會報德記是宣德郎楚邱縣令田說書其篆至劣寫徐爲徐汴爲汴度爲度儻爲儻窳爲窳唐人之不通篆學如此汴州以水名卽水經汴水出陰溝于浚儀縣北又東至梁郡蒙縣爲雒水地理志滎陽卞水在西南亦但作卞徐鉉注說文云汴今作汴非是或說隋煬帝避反字故改爲汴然則猶飯作飣之屬也今依隸造篆不成字

體若从地里志作卞亦當篆作卞字不應下加、也後  
功族子通鑑大歷十四年二月魏博節度使田承嗣薨有子  
十一人以其姪中軍兵馬使悅爲才使知軍事即悅是也後  
爲田緒所殺贈太尉見劉昫唐書德宗本紀

盧鄴女姚婆墓志

大中六年十月立正書盧鄴撰在滎澤

碑云葬于鄭州滎澤縣廣武原祔叔祖贈給事中府君之松  
檟史記項羽本紀云項王已定東海來西與漢俱臨廣武而  
軍括地志云東廣武西廣武在鄭州滎陽縣西二十里戴延  
之西征記云三皇山上有二城東曰東廣武西曰西廣武各  
在一山頭相去百步汴水從廣澗中東南流今澗無水城各  
有三面在敖倉西郭緣生述征記云一澗橫絕上過名曰廣

武相對皆立城塹遂曰東西廣武碑云滎陽縣廣武原卽其地也

右僕射高元裕神道碑

大中七年十月立蕭鄴撰柳公權正書篆額在洛陽

碑缺撰人名据金石錄書之篆額甚工而無人名碑稱元裕曾祖迥大父彪皇考集銜名皆與宰相世系表合惟世系表誤彪作彪劉响唐書有高元裕傳亦正作彪知碑是也碑載元裕官爵事實亦較史詳備云贈尙書右僕射劉响書亦未及舉云歸葬于河南府伊闕縣白沙之南原今碑在縣南三官凹田間是其墓也

韓昶自爲墓志

大中九年十二月立子口正書在孟縣

劉昫唐書韓愈傳云子昶亦登進士第此昶自述其爲張籍  
樊宗師所賞及爲柳公綽牛僧孺辟薦終于襄陽別駕檢校  
戶部郎中也昶之孤陋至以金根車爲金銀車爲時所譏碑  
中自云其文中字或出經史之外樊讀不能通其誇甚矣又  
云稍長愛進士及第見進士所爲之文與樊不同遂改就從  
之欲中其彙年二十五及第豈唐時制舉之文已與著作家  
不同邪碑列三代名銜及後有孤子口書丹篆口其字漫滅  
似是緄字云葬孟州河陽縣尹邨者今孟縣城西五十里蘇  
家莊卽古尹邨莊南土山有塋周圍數里其東南有家甚高  
餘諸冢稍卑俗呼尹丞相墳萬歷間盜掘一小墓得石棗荆  
棘中樵夫負去將爲砧或告于官驗之乃昶墓志也遂封其  
墓而置其石于韓愈祠壁中近人劉青黎述喬騰鳳說如此

因作孟縣韓文公墓考謂大塋卽愈墓也

鄭恒崔夫人合葬墓志

大中十二年二月立秦貫撰正書在潞縣

碑云高祖世斌皇左司郎中礧隰二州刺史新鄭縣開國男

曾祖元嘉皇新鄭長水縣令襲封新鄭縣開國男按宰相世

系表鄭氏有世斌左司郎中子元嘉長水令頗與碑合碑下

云祖有常烈考琛賢府君諱恒子曰瓊曰瑾曰玘曰璩曰琬

此世系表所無世系表又有恒爲守忠之子在前數十格不

知何故又云鄭之先周皇封舅之地且至以皇爲王負環竒

之名以環爲瓊大謬卽後人僞爲之亦必有舊文可据何爲

若此又一碑文字悉同府君諱恒恒字作遇恐後人得鄭遇

碑改爲鄭恒以徇世者二碑俱在潞縣曠園禱志云鄭恒暨

夫人崔氏合葬墓在淇水之西北五十里成化間淇水橫溢土崩石出秦給事質所纂志銘在焉犁人得之鬻諸崔氏爲中亭香案石久之尋得其家有胥吏名吉者識之遂白於縣令邢某置之邑治或傳此志銘又于康熙初年崔氏見夢于臨清州守守從學宮自穢土中清出据此則碑不識何時移至濬縣臨清之說尤屬傳謫不足信也

左拾遺孔紵墓志

咸通十五年三月立鄭仁表撰并正書在滎澤

紵孔子四十世孫父溫裕祖鄭曾祖岑父皆與宰相世系表合惟紵字持卿世系表則作特卿蓋誤碑中出將下傍注去聲二字金石未有其例又云公謝世之月餘日前與二季處齋室中忽援毫書廿八字於室內東展之上若隱語而加韻



焉曰許下無言棄少年震而不語月書弦風濤渭逆餘艤沒  
從此無舟濟大川許無言是午字今歲在午也震不語是辰  
字其哀瘵至甚移歸院就醫是辰日及大然之日驗於官歷  
是上弦日又應月當弦之讖也其事甚奇異紆爲左拾遺而  
稱公孔融稱康成爲鄭公漢書亦多稱人爲公是相重之詞  
近人作碑志執非三公不得稱公之論嫌其太拘也韓愈撰  
有正議大夫尚書左丞孔戣墓志銘云葬公於河南河陰廣  
武原先公僕射墓之左是紆數世皆葬于此鄭仁表滎陽人  
有贈妓僊哥及洛真詩又有經過滄浪峽長亭走筆題句俱  
見全唐詩

佛頂尊勝陀羅尼幢

咸通六年八月立曹彥揆李遇正書在許州

碑云造石香幢一永充供養書幢作懂當是古字說文新附始有懂字其實當爲幢从心者古人假音猶勝作懂也西安經幢亦多用懂字徐鉉若能見此必注說文懂下云俗作懂矣

尊勝經幢記

乾符二年十月立鄭昌嗣撰并書在滎陽南寺

幢凡八面文右行字亦疏爽後有記及讚云大唐乾符二年歲在乙未十月十五日建計用功價見錢捌拾貫文米麵共伍拾碩茶二十斤鹽貳拾斤鑄匠李約魯敬存又一面題字云大宋國乾德二年歲次乙丑三月庚辰朔二十五日丙申比邱僧口口發願重建則此幢唐時鑄刻年久倒落至宋復立者也斤柘之字本从禾後省作石此借作碩亦前所未有

謁昇仙太子廟詩碑

乾符四年閏三月立鄭畋撰正書在偃師

朱長文墨池編有此詩詩爲五排字似石經體後有序云余  
大中八年爲前渭南縣尉又自署云開府儀同三司行門下  
侍郎兼兵部尙書平章事監修國史按劉昫唐書鄭畋傳云  
畋字台文滎陽人也以書判拔萃授渭南尉又云乾符四年  
遷吏部侍郎尋降制曰可本官同平章事僖宗上尊號禮畢  
進中書書侍郎進階特進轉門下侍郎兼禮部尙書進賢殿  
大學士頗與碑合惟史誤兵部爲禮部當以石刻正之傳又  
稱畋文學優深器量宏恕美風儀神采如玉尤能賦詩與人  
結交榮悴如一然則當益貴其詞翰矣

佛頂尊勝陀羅尼經幢并銘

乾符五年八月立口筠撰正書在口口

前有序略述婆羅門僧佛陀波利儀鳳元年從西國到五臺  
處乞見大士文殊師利尊儀見一老人今向西國取尊勝陀  
羅尼經至京奏帝帝令三藏法師及杜行顛等共譯此經禁  
在內僧請流行云云凡經幢多有此序蓋得經之源委耳  
匡國軍節度使馮行襲德政碑

李宏懿正書在許州

碑字摩滅可辨者云有孫喜者聚徒數千又云軍吏迎謁公  
在側擊之其事具薛居正五代史列傳云僖宗在蜀有賊首  
孫喜者聚徒數千人欲入武當刺史呂晁惶駭無策畧行  
襲伏勇士于江南乘小舟送喜謂喜曰郡人得良牧衆心歸  
矣但緣兵民多懼擄略若駐軍江北領肘掖以赴之某前導

以慰安士民可立定也喜然之既渡江軍吏迎謁伏甲奮起  
行襲擊喜仆地仗劍斬之卽其事也又云忽有烏鵲羣萃啄  
食無口又云年口縣麥秀兩岐薛史云境內有大蝗尋有羣  
烏啄食不爲害民或艱食必有稽穀出于隴畝亦其事也撰  
碑人殘缺惟前一行存翰林學士奉數字薛史云遷匡國軍  
節度使在許三年上供外別追助軍羨糧二十萬石及太祖  
郊禋行襲請入勤貢獻巨萬恩詔殊厚尋詔翰林學士杜曉  
撰德政碑以賜之則此正其德政碑曉所撰也碑應建于天  
祐中今僅存八月甲午朔十八日辛亥建云云而已舊惟見  
篆額在州治前民舍中人稱長樂王德政碑頃屬知州李君  
煒掘土出因移置學宮

太子左庶子分司東都上柱國范陽某君墓志

正書在偃師

碑字摩滅惟首行可辨云口口大夫行太子左庶子分司東都上柱國范陽其下缺按范陽當是盧氏有名錯者爲左庶子見宰相世系表未知此是非偃師又有盧東美盧顛二墓亦不敢據以定此碑也

敬善寺石像銘

李孝倫撰正書在洛陽

碑無年月述紀國太妃韋氏造像之美其文甚麗字體亦工其寫鶴爲鶴祕爲秘橢爲籠絜爲索翠爲翠夙爲夙皆別字云南控鸞川按中山經云茲山茲水出焉而北流注于伊水水經注云伊水自熊耳山東北逕鸞川亭北茲水出茲山北流際其城東而北入伊水世人謂伊水爲鸞水茲水爲交水

故名斯川爲鸞川也檢今方志無葦水鸞川之目蓋後人俗呼失其音字賴碑碣流傳尋經脈水足証上古禹書非無徵信耳

尊勝經幢

正書在新鄭縣佛寺

幢凡八面字甚工缺其半面惟正書額云上爲開元神武皇帝下缺知爲唐物也其字甚工當是名人毫翰中州金石記云永淳元年刻今有開元神武皇帝云云則疑未的

嵩岳寺尊勝經幢

正書在登封

無撰人年月字亦甚工未甚摩滅寶刻類編有嵩岳寺題經經首十字曰楞伽阿跋陀羅寶經一部徐浩書天寶中立在

洛疑又一幢洛陽伽藍記云嵩高中有開居寺唐李邕嵩嶽  
寺碑云嵩嶽寺者後魏孝明帝離宮正光元年廢開居寺隋  
仁壽一載改嵩嶽寺

隋羅尼經殘字

正書在洛陽

今爲明隆慶時趙若刊伊闕二大字于上其文尙隱隱可辨  
後有願捨女身得成男子云云餘惜摩滅明人之不好古往  
徃如此予前撫關中因護送川兵過九嶼山見一碑有宋吳  
說書諦視之猶得數十字而亦爲明人刻上九嶼山絕句詩  
一首于碑吳說固以游絲書有重名予惜之當與此經殘字  
裝背成帙也

商王廟碑



樂著撰隸書在安陽

碑爲商河甌甲遷于相而作也文不全其號年無攷著自題前中大夫荆王府文學書體亦似唐人故置于此王叔璠以爲金時物金無此官制恐非也

梁

葛從周神道碑

貞明二年十一月立張璉撰行書在偃師

碑字多摩滅書人缺名可辨者云故昭義軍節度澤潞等州觀察處置等使開府儀同三司檢校太師下缺云其先濮州鄆縣秦口口人也云曾祖阮祖遇賢父簡贈兵部尚書云青兗三寨鯨鯢萬人勦賊無遺輜重皆弃云以功缺部尚書時溥復統全師陽山下寨云退上黨藩戎喪膽改授懷州刺史

屢立殊勲繼膺賞典云落落領二千騎缺馬步二千殺戮殆  
盡生擒落落奪馬二千云尋授節旄假缺昭義兩使留務口  
軍周揚五之衆云授宣義軍行軍司馬俄代丁會入潞州云  
檢校司徒又入井陘攻討并部降李洪範云加太子太師食  
邑二千戶十月三日歸葬于偃師縣毫邑鄉林口里之別墅  
皆與薛居正五代史不甚異疑薛据此碑而爲傳其子見于  
碑者次曰彥勲金紫光祿大夫檢校工部尚書前守洪州別  
駕缺次曰彥浦殿前口旨銀青光祿大夫檢校太子賓客則  
史未及載按之歐陽修史所載從周擊晉兵事云從周以精  
兵自關門出擊敗晉兵晉王怒自將擊從周從周雖大敗而  
梁兵擒其子落落送于魏斬之其言從周兵敗梁兵擒落落  
甚與碑異薛史則云魏遣其子落落率二千騎屯洹水從周

以馬步二千人擊之殺戮殆盡擒落落于陣并帥號泣而去則與碑同此碑奉勅書撰斷無冒列功狀是歐陽史爲失實也歐陽史所載歷官晉秩亦多疏略賴有此証之碑云偃師縣亳邑鄉今之淮廟卽古西亳湯都也進士武君億跋碑云郵縣史作郵城爲梁太祖父嫌名避之周揚五者周德威小字史作陽誤也

唐

重修古定晉禪院千佛邑碑

天成四年九月立釋道清撰正書在武安

俗名透影碑下半毀損有云東魏黃初三年高歡帝所造也以曹魏年號爲元魏未審何以謬誤至此又云雜集異記云魏時有大業僧不知生族諸天降食以供其齋忽夜夢二

凭

下

於山石邊有大桐樹本堅枝密其僧將法衣往樹欲掛

其樹忽爾開而隼之儼然掩合神力弥縫乃婚媾長於二子

後一十二年却至樹邊樹開而

下

有虎口菴前師乃以手約

杖驅而皆弭伏後之人因其樹号桐禪師之寺焉又改爲定

晉禪院按太平御覽引談數曰北齊高祖多殺戮有桐禪師

者以業行著稱云云豈卽其人與中山經云虎首之山多直

桐樞郭璞注桐未詳也說文桐木也而見于此終不知何木

### 尊勝經幢

長興三年八月立正書在鞏縣淨土寺

幢後題維大唐國洛京河南府鞏縣淨土寺今於當寺建豎

尊勝經石幢云云按淨土寺卽魏石窟寺王世充與李密相

持世充渡洛水過倉城爲營與密戰于石窟寺東卽此寺也

尊勝經二幢

應順元年正月立雲水最閑正書在濟源龍潭寺

一幢末書祖克用父玩兄河陽節度押衙充濟源鎮遏使下  
多摩滅亦不知爲何人也幢中寫給孤獨園爲蘭字尤可怪  
一幢題雲水最閑書疑亦僧人法號而莫察其姓名也

晉

法行寺經幢

天福三年四月立正書在汝州

字甚摩滅案方志汝州亦未載法行寺

周

尊勝經幢

廣順三年十二月立正書隸額在修武

幢字甚朴率惟題額以幢爲幢从心猶用古字說文無幢字  
徐鉉妄增之當作幢或借幢也

郭進屏盜碑

顯德二年五月立杜韓撰孫崇望行書在衛輝府治

碑云士庶列狀以上聞述去盜之由稱守臣之美宜乎旌其  
長可其表命之刊勒口其口口乃勅朝請大夫行右補闕柱  
國臣杜韓序而銘之宋史郭進傳云周廣順二年秋遷登州  
刺史會羣盜攻劫居民進率鎮兵平之郡內清肅民吏千餘  
人詣闕請立屏盜碑許之顯德初移衛州衛趙洛開多凶命  
者以汲郡依山帶河易爲出沒伺閒椎剽吏捕之輒遁去故  
累歲不能絕其黨類進備知其情狀因設計發摘之數月間  
剪滅無餘郡民又請立碑記其事卽此碑也据史則登州宜

亦有屏盜碑未之見也

黎陽大岨山寺准勅不停廢記

顯德二年五月立馬去非撰正書在濬縣

碑上爲勅下爲記云大岨山者上摩乾象下壓坤牛左巨浸而右大行以黎山爲大岨亦承唐以來相傳之誤蓋是時僧居有勅額者存無者廢故刊此碑于寺後列前黎陽發運使銀光祿大夫檢校工部尚書兼御史大夫上柱國孫邨等名

中州金石記卷四

賜美第兵部尚書都察院右都御史督師湖南等處地軍務兼糧餉暫留河南巡撫

宋

重修中嶽廟碑

乾德二年八月立駱文蔚撰并行書僧守峯篆額在登封  
字去唐未遠猶存格韻後列廟丞廟令及監修官名

西陽明洞記

乾德五年七月立霍錢撰行書在濬縣

碑云大岷山側有龍窟窟之北有石壁每至日昃山半夕陽  
照明又云定驗其氣嘗至雷發聲則盛雷收聲則微錢以元  
年爲莊宅副使見而名其洞也

龍潭寺尊勝經幢



開寶六年十月立正書在濟源

字多摩滅亦不甚工

重書龍池石塊記

開寶四年立正書在濟源

碑述漢通容元年大早有河內李繼安泛湖至君山廟見朱衣人將書一封稱達至濟源龍池擊石必有人出此書玉皇勅下濟濱神行雨李繼安以書扣石事驗因有刻石而重書之也攷南北兩漢無通容年號蓋流俗傳說之事不可徵信如此著之碑碣何其謬與

白沙關畫象

開寶六年三月立在光山縣

光山白沙關上古廟後磨厓刻一人形衣冠甚偉左旁書關

寶六年三月十二日右旁書省條開白沙關明一統志云光山縣東南有五關一曰白沙宋紹興間江州都督趙麼建方志據關上有天福年字謂建關又在紹興前攷水經注云淮水又東右合壑水水出白沙山東北逕柴亭西則關以山名也地形志沙州蕭衍置魏因之治白沙關城則自蕭梁前已有此關矣云省條者蓋宋時中書省勅旨五代史職方考光州爲南唐所有至周顯德五年取淮南等十四州而宋平江南在開寶八年大抵前塞此關以限南北至開寶六年將用師因開是關以通徑途也予屬今知縣楊君殿梓訪天福刻字及縣中烟水堂李陽冰篆不可復得幸獲此刻楊君並能考其故實云

新修嵩嶽中天王廟碑銘

開寶六年十二月立盧多遜撰孫崇望行書在登封

其月多遜已爲中書舍人參知政事見宋史而碑不列此銜不知何也崇望書郭進屏盜碑甚瘦勁此又以圓湛勝王世貞弇州山人豪指爲吳通微院體之遺予觀宋初人書尙有唐人風格不似後來逞姿作勢致臨書者未盡其長先受其弊耳

金剛般若波羅蜜經并心經

太平興國二年十月立趙安仁正書在祥符國相寺婆塔

碑爲沈繼宗建末有銜名東都事畧趙安仁傳云字樂道河南洛陽人也遷尙書右丞改御史中丞卒贈吏部尙書謚曰文定滕康翰墨叢記云梁景不善書每起草必用蜀牋趙安仁善書必用舊紙人號二背

十善業道經要畧

太平興國二年十月立趙安仁正書在祥符國相寺婆塔

碑末列沈繼宗趙孚吳載沈繼明李護田誠沈昉時貞吉李  
廷温韓奉進宋元與諸人銜名

龍潭寺尊勝經幢

太平興國九年口月立正書在濟源

字甚摩滅此與開寶六年經幢同在一寺

善才寺觀音院記

淳化元年五月立揚口撰梁文素行書并篆額在禹州城內  
天寧寺

碑文漫滅不可讀蓋述寺僧從軌興修之事楊君時爲宣補  
鎮遏使亦見于碑按今方志無善才寺則寺廢久矣天寧寺

中復有宋仁宗御書天竺唵斛咀囉字碣悉亦不存也

### 西京白馬寺碑

蘇易簡撰并正書在洛陽

碑甚摩滅斷爲二截有云

鉄

馱經之地口其由口中國招提

之始按洛陽伽藍記云白馬寺漢明帝所立也佛入中國之

始寺在西陽門外三里御道南帝夢金人長六項皆日月光

明胡神號曰佛遣使向西域求之乃得經像焉時白馬負經

而來因以爲名故碑亦云也碑年月殘闕惟存禳四月八日

及前有翰林學士承旨朝請大夫中書舍人上柱國賜紫金

中缺簡奉勅下缺云云知爲蘇易簡也中州金石攷云只存

上截今予所得有下截云易簡入爲右拾遺知制誥除翰林

學士淳化中充承旨見東都事畧本傳則此碑淳化時立故

置于此

夏家堂經幢

至道二年四月立正書隸額在汝州

幢正書題額云佛頂尊勝陀羅尼真言中書經文後書同造人及會首同會人名

趙玘改葬碑

咸平二年七月立子惟永撰姪嚴正書分中正題額在汝州按碑玘葬于浚儀縣旌孝鄉黃渠里又改作墓事扶護神柩安葬于山莊之右蓋從浚儀改葬于汝時惟永撰碑以紀之并述玘行事也攷薛居正五代史周世宗本紀云顯德二年閏九月壬子西南而招封伊王景奏大破西川賊軍於黃花谷癸丑秦州僞命觀察判官趙玘以本城來降詔以玘爲郢

州刺史東都事畧趙普傳云普遣親吏市木關隴吏私市大木冒稱普所市以規利前三司使趙玘以白太祖詔問太子太師王溥等普當何罪溥等奏趙玘誣罔大臣乃出玘爲汝州牙校事與碑合末爲惟永自述其隱逸之行碑凡四面字起左側又有曾孫口捧硯皆金石未有之例

建河南廣武原宣聖家廟碑記

大中祥符二年十月立王羽騰撰正書篆額在滎陽

碑云祥符元年駕幸曲阜釋奠廟林賜孔氏男女錢帛有差又云四十五世孫孔延世襲封文宣王奏曰孔氏尙有隨駕參軍孔晃一枝住在河南廣武原族也上召晃問曰臣祖孔戮任唐禮部尙書國公孔緯皆荷先朝御葬廣武原子孫守墳奉祀隨口遂不能以東歸上喜賜口帛有加策命留守王

羽騰來原建修家廟云云按宋史云至道三年九月以孔子四十五世孫延世爲曲阜縣令襲封文宣公東都事畧云大中祥符元年十一月幸曲阜進謁文宣王廟加上文宣王曰元聖文宣王正與碑合宰相世系表曲阜憲公務本頴達族孫子如珪如珪子岑父岑父子幾幾子溫孺溫孺子緯緯弟紆今滎陽有左拾遺孔紆墓志知孔子後廣武一枝實非誣也

### 龍門銘

大中祥符四年三月立真宗正書并篆額在洛陽

李燾通鑑長編云大中祥符四年二月辛酉具法駕詣睢壇三月己卯車駕入西京今碑云躬薦兩圭祀汾陰而祈民福言旋六轡臨維宅而觀土風卽其事也玉海云祥符四年三



月癸未作游龍門詩有寶塔一新輝勝槩玉毫口飾罄殊功  
之句又作龍門銘書史會要稱真宗善書得晉人風度觀此  
碑欲出蔡襄之上宋代未有過之者朱子評書云書學莫盛  
於唐然人各以其所長自見而漢魏之楷法遂廢入本朝來  
名勝相傳亦不過以唐人爲法至於黃米而敲傾側媚狂恠  
怒張之勢極矣朱子之言如此予觀真宗書乃無此弊當時  
見之得不慙然心服邪

石保吉神道碑

大中祥符四年十一月立李宗諤撰白憲行書并篆額在洛

陽石碑室

保吉守信之子保興弟傳俱見東都事畧白憲書復有大中  
祥符七年中嶽中天崇聖帝碑在登封字亦端雅

石保興神道碑

大中祥符四年十二月立楊億撰尹熙古行書并篆額在洛陽石碑室

保興守信之子碑載事蹟與宋史頗合而歷官較詳云建隆初以任子之令補東頭供奉官俄遷尚食副使即拜如京使命爲御營四而都巡檢未幾領順州刺史太宗以爲御寨四面都巡檢中原平加實封下缺命爲高陽關駐泊都監會先王

捐館有詔起□□將軍順州團練使命爲銀夏綏麟府州故關都巡檢使俄丁內艱中旨抑奪出爲澶州駐泊都監未幾知莫州軍州事俄爲西京水南北都巡檢使月餘真拜斬州團練使京兆府駐泊兵馬鈴轄兼管華耀乾商巡檢兵馬捕盜等事徙爲延州路鈴轄兼管界都巡檢使至道中命范

廷名爲都部署俾公副之命知威虜軍事就拜棣州防禦使  
以足疾移知邢州又改知澶州事賜告家居以宋史本傳勘  
之惟保興太祖時卽爲御營四面都巡檢及加實封云云史  
未及載又保興先爲銀夏綏麟府州故關都巡檢使丁內艱  
起爲澶州駐泊都監史載澶州駐泊在徙銀夏綏府都巡檢  
使之前當以碑爲正餘銜亦少有異同碑云公本名貞太祖  
改錫今諱史云本名保正太祖取興宗之義改之東都事畧  
亦作保正宋人避仁宗嫌名故也按碑保興葬于河南洛陽  
縣平樂鄉宣武邨梓澤原之先塋今墓見存尹熙古者書史  
會要云官翰林待詔工篆得撥鐙法所書爲一時之絕觀其  
行書有唐人風格而出于王右軍信可愛也東都事畧保興  
傳甚畧而宋史甚詳當据此碑而作然則金石之傳其功不

小矣

中嶽中天崇聖帝碑

大中祥符七年九月立王曾撰白憲行書并篆額在登封

李燾通鑑長編云大中祥符四年五月詔加上中嶽曰中天崇聖東都事畧載其詔曰峻極之嶽神靈主焉其加上五嶽帝號卽碑所云也白憲書名不甚顯觀其筆蹟雖使蘇靈芝李邕爲之不能復過北宋人物之盛亞于唐代矣

重修淮瀆長源公廟記

大中祥符七年十一月立路振撰楊昭度行書并篆額在桐  
柘淮源廟中

長源公者唐時封號太平寰宇記云淮瀆舊有淮瀆令掌此  
祠唐天寶中封淮瀆爲長源公廟中有石龜十枚極大此述

開寶中遣使視廟詔營繕之及祥符嚴飭嶽鎮海瀆之望也  
昭度書畧似唐太宗宋時館閣諸臣工書如此文亦整飭可  
觀

重刻白居易詩

大中祥符八年閏六月立段羣玉行書在濟源濟瀆廟

金石錄有太和五年白居易游濟源詩馮宿詩附今後有太  
和五年題字又一行云段羣玉重書立似居易詩刻北宋時  
已失之因重刻于石宜今訪之不得但不知趙明誠何以見  
其原刻耳

摩騰入漢靈異記

天禧五年正月立僧景遵行書在洛陽白馬寺

長興三年二月八日記天禧五年二月七日重建景遵無書

名而字體絕類聖教序北宋人書猶有晉唐風格良可愛也  
增修中嶽中天崇聖帝廟碑銘

乾興元年六月立陳知微撰邢守元行書在登封

碑爲大中祥符六年癸丑至乙卯歲增修殿宇創造碑樓而  
作陳知微宋史有傳邢守元書亦謹飭似唐人又有所書北  
嶽安王聖帝碑

### 濟瀆詩

天聖三年十月立張旻撰男得一行書在濟源

詩五言六韻有序云余自天禧元祀解宥密之職首治是邦  
越朞月而移他郡于今八載復領藩政時旻爲淮南節度使  
判軍州事謁廟所作也衡名正書甚工詩及序行書多用曳  
筆取姿致字體敲側唐人規格于是決裂盡矣

龍門佛龕題名

天聖四年三月立正書

碑凡八行行十字云西京龍門山大象龕題名三班借職監  
伊河竹木務兼本鎮煙火修整石佛石道公事口口弟祐并  
仲子觀鄉友口吏顏翰安定胡汎同至此大宋天聖四年丙  
寅三月二十六日書鐫手李口其文右行字亦有筆力惟寫  
鄉爲鄉甚謬

濟源縣令陳省華善政錄

天聖九年四月立楊虛已正書在濟源

虛已行書習王羲之正書亦似歐陽詢宋代書法之工者而  
其名不顯何與

賀蘭棲真勅書并詩序碑

天聖九年十月立汪仲詢撰楊虛已行書在濟源

碑分三格上層爲勅書并詩中層爲張齊賢陳堯咨詩下層爲序序知縣事裴德滋刻石之事也棲真宋史有傳虛已書甚工又有延慶禪院修舍利塔碑云習主義之書風格極似乃歎古人仿古之精如此張齊賢陳堯咨史皆有傳

永安縣緱山通天觀重修昇仙太子大殿記

明道二年六月立謝絳撰僧智成正書王顧篆額在偃師

碑文工整字亦端秀有唐虞褚風格緇流辦此當有書名而不聞其人或有捉刀者與

會聖宮碑銘

景祐元年九月立石中立撰李孝章正書并篆額在偃師

宮在北邙山鳳臺山上爲宋時祭陵飲福之所宋史云天聖



八年春正月作會聖宮于西京永安縣以奉三聖御容歐陽修亦有會聖宮頌云國家采漢書原廟之制作宮于永安以備園寢碑立于景祐蓋天聖年作宮至是始成也宋時永安金改芝田縣今爲偃師芝田鄉碑云按地誌訾王山者冠於諸阜僉曰隩區考水經注洛水又北逕偃師城東東北歷鄆中逕訾城西司馬彪所謂訾聚也訾王山當以訾聚得名矣索長官畫象并廟創塑部從記

景祐二年三月立梁佐撰正書篆額在密縣

畫象在索君墓上墓去縣里許向聞其刻因飭縣令訪得之碑畫一官二從者一老嫗一獸形但無款識年月按方志載索長官於五代時宰密虎入境噬孀婦王氏子婦訴長官牒追虎卽銜蹠至庭長官叱使出境虎患遂絕其廟中景祐碑

文云索長官未知何代人也雖祀典不載據圖經所述云昔  
宰是邑之日有惡獸入境屢爲人患遂於公介中選有膽勇  
者一人令執牒而往追之懼其見啣乃致於行徑中而復其  
獸見之自啣牒而至訟庭踞地而伏公實仁慈惡殺惟再三  
懲戒叱責而已良久捨之放令出境而去所記無孀婦王氏  
之說又不云五代人不知方志更何所據今畫象在墓前碑  
記在廟中索長官若五代人則畫象亦刻于此時矣以無字  
跡可考故連屬于廟記其記篆額甚少如寫廟从囟寫𠩺爲  
𠩺之屬又篆額有塑字攷說文玉篇所無惟見廣韻云塑像  
也又有堦字云捏土容蓋後人造作此文今因隸爲篆不經  
甚矣碑因寄居蔡興塑部從于廟之事而作也

延慶禪院新修舍利塔記

景祐三年六月立馬元穎撰楊虛已行書郝黯篆額在濟源  
題云江陵楊虛已習晉右大將軍王羲之書其書極似聖教  
序古人摹仿之工如此碑中有云涅槃丈六之身槃四八之相  
涅槃二字出妙法蓮華經云我法離生老病死究竟涅槃今  
分用其字前未有

濟源延慶寺范坦陳堯佐詩刻

景祐四年十一月立陳學古正書在濟源

學古堯佐第三子堯佐遺書范坦詩及已詩于碑後有景祐  
三年陳諭范宗傑攜挂寺閣題字又有景祐四年馮求已祝  
諫同移題字歐陽修爲堯佐神道碑云明道二年知永興軍  
又云累官戶部侍郎景祐四年召拜同中書門下平章事蓋  
此時爲詩也范坦見宣和畫譜云字伯履洛陽人以蔭補官

長於吏事所至皆以明辨稱善丹青作山水其筆法學關全  
李成延慶寺唐垂拱初建河南通志誤以范坦詩爲黃庭堅  
詩急宜改正

淮源廟鉄鐘識

慶歷三年二月立正書在桐柏

上題唐州二大字下列朝正大夫行汝陽縣令口大德右侍  
禁監消稅務杜策口口供奉官唐州兵馬監押口口口巡檢  
寇口朝奉郎守殿中丞唐州監消稅務上騎都尉賜緋魚袋  
李口朝奉郎守尙書屯田郎中知唐州軍州兼管內缺尙口  
將仕郎汝陽縣尉兼口口事尹贍孫將仕郎守司法參軍王  
口口登仕郎守唐州司理口口口下列拾鐵捨人名後題  
都維那頭楊興造作人男尹光大宋慶歷三年歲次癸未二

月已亥癸卯日錢字作禾已見于此或云泉字草書

龍潭寺題壁絕句詩

慶歷三年五月立任布撰黃孝先行書在濟源

任布時爲尙書工部侍郎知河陽三城賫御署祝文詣濟瀆  
廟遊龍潭寺與僧話陳中令爲邑大夫樞相太師太尉昆仲  
皆曾聚學是院今樞密太尉杜公麻衣時亦常遊處作詩以  
慰僧之自嘆也籠沙故事往往有之豈以此調寺僧歟孝先  
時知縣事字甚工

題龍潭詩

皇祐五年十二月立富弼撰正書在濟源

詩云亂山深處一龍潭竹削琅玕水潑豔更倚雲巖構蘭若  
直疑風物勝江南乾隆四十九年春河北道康君基田濬瀛

西源潭得之前人未之見也碑字甚方整筆力似顏真卿書  
史會要稱弼擅篆翰其蹟祿見羣玉堂法帖中

梅歐唱和詩

至和元年十月立隸書在滑縣

此詩當是梅摯知滑州事時所作也并書歐陽修和詩碑無  
書人名意摯自書之

范仲淹神道碑

至和三年二月立歐陽修撰王洙隸書在洛陽

碑記仲淹名拜右司諫當太后臨朝聽政時以至日大會前  
殿上將率百官爲壽公上疏言天子無北面云云宋史載其  
事在拜右司諫前云太后崩名爲右司諫東都事畧云出通  
判河中府久之仁宗記其忠名爲右司諫在上疏後下云章

歐崩又各不同碑云爲環慶路經畧安撫招討使兵馬都部  
署史云爲環慶路經畧安撫緣邊招討使與碑微異其餘頗  
同此碑隸書稍勁多帶篆體真出唐人隸書之上惜下截及  
書撰人名字多漫滅杜大珪名臣琬琰集載其全文是歐陽  
修所著也王洙宋史有傳墨池編稱其晚喜隸書尤得古法  
當時學者翕然宗尙而隸法復興中州金石攷云有仁宗篆  
額褒賢之碑今未搨得

龍潭留題詩

至和丙申年三月立何嶠陳君章撰正書在濟源

何陳各賦五古一章爲院主僧清平所立而無書人名紀歲  
至和丙申蓋三年也

大關堂記

嘉祐元年十一月立梅摯撰楊稷行書在滑縣治內

碑云東都大閱堂今三司使端明貳卿張公出牧日經始之  
又云予幸承攝明年春乃率僚吏落而按之是時摯知滑州  
成此堂也摯字公儀成都新繁人宋史有傳云擢天章閣待  
制陝西都轉運使還判吏部流內銓進龍圖學士知滑州州  
歲備河調丁壯伐灘葦摯以疲民奏用州兵伐之河大漲將  
決夜率官屬督工徒完隄水不爲患詔獎其勞勾當三班院  
同知貢舉此銜云龍圖閣直學士尙書吏部郎中知滑州軍  
州事正與史合摯知滑州惠政皆見于史後人當何如重其  
文而并護其遺石邪中州方志至漏畧予故爲摭史事著于

編

翊聖真君祕誥



嘉祐五年七月立正書在登封文昌宮

嵩陽石刻記云在崇福宮字法方整近顏書

二體石經周禮殘碑

嘉祐六年五月立章友直楊南仲篆書在陳留

玉海云仁宗命國子監取易詩書周禮禮記春秋孝經爲篆

隸二體刻石兩楹嘉祐三年五月十五日王洙薦大理丞楊

南仲石經有勞賜出身六年二月一日國子監言草澤章友

直篆石經畢詔補試將作監主簿友直不願仕賜以銀絹五

月以同篆石經殿中丞張次立與堂除故書史會要稱楊南

仲與章友直篆石經又有張次立同篆也今僅存周禮卷一

及卷五中數石中興館閣書曰石經七十五卷楊南仲書周

易十書十三詩二十春秋十二禮記二十皆具真篆二體獨

無周禮不知何故此石篆書甚工但多別字敘从支今从又  
臧卽藏今加州是皆依正書作篆不加考古之過于古文祧  
當爲濯見周禮注詔當爲紹見禮記注今亦不能考正其文  
僅用徐鉉新附爲之亦甚凡淺予嘗見蔡邕唐元度等經石  
皆有變體李陽冰自願書經觀其他刻石亦不盡合篆法蓋  
一代之石經之時欲求通六書人又能作篆書者固亦難矣  
經云凡王后有擇事於婦人今板本作摻事周密癸辛襍識  
云泮學卽昔時太學舊陟九經石版堆積如山一行篆字一  
行真字予撫中州釋奠賢宮卽詢是刻不可得學官云修學  
時用作旣旣矣僅存陳留數石豈不惜哉

韓愷墓志銘

嘉祐七年十一月立韓琦撰并正書在安陽

碑云愷字和仲余姪殿中丞公顏之次子又云乃于相州安陽縣新安邨先塋東百步之近得地吉用丙穴以葬愷蓋附國華冢也方志載韓氏墓甚祥獨遺愷墓賴有碑碣以存之耳

### 宋仁宗飛白碑記

嘉祐八年十一月立御書飛白字吳充撰記并正書陳知和隸書題額在偃師

碑上層爲飛白書帝字旁題云勅建大招福寺家佛堂賜進士翰林院學士陳帝字下有寶畫下層爲吳充記所述陳曰喪母在家先帝棄羣臣因刊御書于先墓之廬也賜書者嘉祐八年正月亦見記中翰林作瀚林尤前人所未有宋史本紀云至和七年幸寶文閣爲飛白書分賜從臣歐陽修歸田

錄云仁宗萬幾之暇無所翫好惟親翰墨而飛白尤爲神妙也玉海亦多稱仁宗飛白書

### 韓國華神道碑

嘉祐八年十一月立富弼撰王珪正書在安陽木谷鎮

國華卽琦之父琦相仁宗乃立此碑

### 畫錦堂記

治平二年三月立歐陽修撰蔡襄正書郤口題額在彰德府治北

此宋韓琦以丞相判鄉郡建于居第者也琦第別有榮歸虛心二堂其後曾孫肖胄守相又建榮事堂襄字方正爲一代絕手此碑尤名于時容臺集稱爲每一字書數字擇其合作者存之名爲百衲碑乃別體不乏寫功从刀矜从子學書者

宜棄其短也錢少詹云琦初封衛國晉封魏國歐陽作記時稱衛國是也板本作魏國公誤甚矣當以碑爲正

陳述古題名碑

治平丙午五月立正書在濟源

碑述先祖太師中令秦國公孟父中令大父太尉相公季父太尉康肅公肄業精舍仲弟求古同遊稚子知雉知方知白知十侍行書子寶元己卯至治平丙午男知素爲濟源縣尉乃立石云其書石行秦國公名省華長子堯叟次子堯佐季子堯咨述古求古堯佐子歐陽修撰有太子太師致仕贈司空兼侍中文惠陳公神道碑銘紀歲治平丙午蓋三年也

新修晉太尉稽公廟記

熙寧三年八月立韓琦撰并正書在湯陰城西南

此琦因湯陰令張懋修廟而記其事也太平寰宇記云湯陰縣浣衣里晉侍中嵇紹葬所按鄴中記志帝師敗湯陰于官皆走獨紹端冕帝側以身捍主遂至見害血濺御衣及事寧左右欲浣之帝曰此嵇侍中之血勿去也詔葬縣南因名此地爲浣衣里是紹墓亦在今縣城西南也墨池編稱韓魏公書骨力壯偉書史會要稱其工正書師顏魯公頗露圭角信然

### 秦王宮諸喪祔悼園記

熙寧五年五月立吳道簽正書在汝州

此記詔舉諸喪祔葬及監護專治脾胃山祇役執事等人名秦王名廷美葬在州城北二十里祔兆凡二十餘冢

### 郭崇妻造象記

熙寧五年五月立正書在滎陽

文云滎陽縣郭下郭崇妻魏口奉爲生身父母亡過者速生  
天界見存者福樂百年特發願心資薦造釋迦佛聖像一堂  
又爲男五哥女子十三姑造大阿羅漢十六尊願合家清吉  
永保康寧家眷昌隆之盛大宋熙寧五年五月日建院住僧  
法經

宗室陳國公祔葬記

熙寧六年六月立馬士明正書在汝州

此記陳國公以熙寧六年正月薨有詔葬于汝州梁縣秦悼  
王墳之次及祔諸喪并作坊專董瑩兆人名

爲哀男清孫造佛象記

元豐元年九月立常景撰并正書在洛陽

碑文甚哀婉字亦秀美云以其平日所遊最樂香山之勝故  
嚮口于佛室之前錢其容於口以追薦之是并刻清孫象也  
云曾王父畫贈屯田員外郎王父吉贈光祿少卿又有祖母  
母妻姓氏景卽其父也

### 大廟條約

元豐元年八月立正書在桐柏淮源廟

其文摩滅已甚恐今仆毀矣篆額紉字作繩以从勺之字从  
口謬甚家以珣以此碑打本及淮源廟宋元人題名見詒因  
爲著錄以珣文登人以名諸生遊京師頗以經學見重于時  
也

### 韓魏公祠堂記

元豐七年六月立司馬光撰蔡襄正書在畫錦堂記碑陰



碑下半漫滅缺書人名以字體知爲蔡襄筆也琦廟在書錦坊

留題濟瀆廟詩

元豐壬戌仲春立文彥博撰正書在濟源

詩爲七言律詩字亦方正似顏真卿彥博時署河東節度使守司徒兼侍中判河陽軍州事應是其自書後題堦薛昌謬立石予誦其詩有未嘗輕作波濤險唯有涵濡及物恩可以想見太平宰相之度紀歲元豐壬戌蓋五年也

相國寺尊勝經幢

元祐五年二月立正書在祥符

明一統志云相國寺北齊天保年間創建今寺遭明季兵火及河流入城圮而復建古刻遂盡惟留此幢在寺右廊字多

摩滅矣

傅堯俞疏

元祐六年九月立李格非撰黃本行書在濟源

疏爲乞置僧院看管先塋事傅堯俞東都事畧有傳黃本字亦甚工有唐人格韻

楊彥則任永夫題名

元祐四年十二月刻任永夫行書在淮源廟

題云杜陵楊彥則河南任永夫同此遊樂道士楊作實預焉元祐乙巳冬十二月巳亥永夫閑誌其字甚工有唐張從申風格

礪谷峯神燈記

元祐庚午十月立張商英撰并草書在林縣

增落英拔民兵過相臺提點監牧殷仲容爲言林慮硤谷峯  
有聖燈乃見之因記其事丁石字亦奇偉可觀張商英宋史  
有傳云字天覺崇寧初拜尙書右僕射謚文忠冷齋夜話云  
張丞相好草書一日得句索筆疾書滿紙龍蛇飛動使姪錄  
之當波險處姪罔然而止執所書問曰此何字丞相熟視久  
之曰胡不早問致予忘之紀歲元祐庚午蓋五年也

### 坦掌都重修堯廟碑

紹聖二年十二月立李勃吳愿撰張洞正書在河內

碑云按覃懷圖經云郡城乾隅三十餘里古有堯聖廟境雖  
群經不載諸子無文况詢諸耆艾傳乎古老昔帝因巡狩帥  
帥至此隨誌三皇述職五帝巡狩者是也困息思漿求无獲濟忽覩斯境猶

掌潤澤帝迺聖意陰符龍指按坦尋感醴泉應手源涌无涸

故因而邨名担掌鄉號利仁其事甚鄙俚今府城北有堯河灌田甚爲民利又有堯池在太行山陽卽此所稱也碑以懇堂懇構爲冑堂冑構其文之劣可知兩人合撰之例亦前所未有也

題巢父亭詩

紹聖四年三月立羅適撰正書在汝州

詩云泊然一枝巢常靜不待息天地存遺井聊以見清德窺者見爾心飲者養爾力何爲病夏畦俯仰無慙色字不甚工今有巢父井在汝州城西郭門外明一統志云旁有巢由廟宋宗舜臣刻王通叟弔巢父文於石

賀蘭栖真詩像并記

紹聖四年十月立真宗撰詩張閏撰記正書在濟源

碑分三格上層御賜詩中層畫栖真像騎驢前一童下層張  
閻因道士郭琨屬爲記也述栖真一百一十有三歲葬于奉  
僊觀之東宋史賀蘭真傳云不知何許人居嵩山紫虛觀張  
齊賢與之善真宗作二韻詩賜之大中祥符二年卒時大雪  
經三日頂猶熱事與碑合而王銍談苑有賀蘭歸真真宗召  
對問點化術歸真奏曰臣請言帝王點化之術願以堯舜之  
道點化天下可致太平其事亦出此碑然則誤棲真爲歸真  
非兩人也河南府志並載失之攷古矣宋時道家揣摩人主  
之意特借堯舜之道文飾其術夫帝王治法豈方士所知驗  
諸設施則其伎立窮矣

### 韓宗厚墓志

紹聖五年九月立朱光裔撰杜紘正書在許州

宗厚韓億之孫緯之子東都事畧無緯傳故宗厚亦不見于史按碑載宗厚歷官自光祿寺丞四遷至承議郎賜六品服所蒞之地多能興水利斷疑獄文繁不具載又云嘗上書言元祐間更按問法天下斷獄死者滋衆請復舊條乞比較州縣獄死之囚數多者行罰事皆可傳又云王文公爲世儒宗樂教育後進君嘗執經請益旣輔政屢欲用君而齟齬不諧是宗厚不附安石尤可嘉尙蘇軾以爲王氏之學好使人同已化天下皆爲王氏之學一望皆黃茅白葦蓋是時如宗厚者固少矣杜紘字亦有唐人風格碑云葬于潁昌府長杜縣嘉禾鄉靈井里先塋之次是亦耐億也今方志亦載億墓而

造宗厚墓

韓宗道墓志

元符二年七月立曾肇撰趙挺之正書在許州

宗道韓億之孫綜之子東都事畧韓綜傳云子宗道元祐初爲戶部侍郎竇文閣待制餘無所及宋史亦同碑述宗道在朝數言事嘗請擇守令明黜陟以覈能不立嫁娶喪祭之制使貧富各安其分詔有司節浮費興遺利量入爲出以制國用有文集二十卷可補史之缺碑字亦完好今億碑在許州城東北三十里碑云葬長社縣嘉禾鄉耐忠憲公兆是耐億葬也方志失載宗道墓非是趙挺之宋史有傳書史會要稱其工筆札其蹟禊見鳳墅續法帖中蓋未覩此碑

重刻唐李翰拜比干廟文

建中靖國元年正月立張琪正書口口題額在汲縣

琪時爲汲縣簿所書李翰文字體秀整在唐人中亦爲絕手

而無書名者豈以位卑邪

題期思遺愛廟詩碣

建中靖國元年九月立張孜撰戴元正書在固始

詩七律碣在期思孫叔敖廟期思今固始鎮名水經云淮水  
又東過期思縣北酈道元注云縣故蔣國周公之後也春秋  
文公十年楚王田于孟諸期思公復遂爲右司馬楚滅之以  
爲縣城之西北隅有楚相孫叔敖廟廟前有碑按碑是漢延  
熹二年立遺愛廟是宋元豐八年勅賜額也張孜名缺以舊  
志知之

勅賜靜應廟牒

崇寧三年五月立正書在河內

此卽宋時所重書上石之牒文因知縣事陳宗祈雨應驗而



賜魏夫人廟號也其原紙牒文至承安時始依式上石見後  
卷

汝帖

大觀三年八月立王冢墓在汝州

帖舊在州治望嵩樓上四方摹搨者多有司苦之明嘉靖間  
詔毀天下淫祠乘此廢去瘞馬廐中後復燬于火

國朝順治七年巡道范承祖懸賞購之方得大半命匠入移  
置道署會稽亦有翻本黃長睿深譏其謬帖中有篆書宗資  
石獸天祿辟邪字集古錄云漢天祿辟邪四字在宗資墓前  
石獸膊上按後漢書宗資南陽安衆人也今墓存鄧州南陽  
界中墓前有二石獸刻其膊上一曰天祿一曰辟邪如集古  
錄所云及此所摹是實有字而明楊應奎重鐫宗資墓記云

啟而築之細尋其字無有也又云故以法帖舊文模而鐫之則其字明時已失不知何也宗資爲南陽太守墓在南陽縣北三里今所存之字既楊應奎所鐫無足取索其蹟爲中州石刻賴有此帖存其形似好古者幸無忽之或荒虛古道復出于後世存此以備考証亦不爲無益云爾

漢太尉紀公廟木帳記

大觀四年八月立周頴撰蔡靖正書李延賁篆額在滎澤碑云武聖皇帝西幸又始口口太尉似述宋時封號紀信以唐麟德二年贈驃騎大軍見劉昫書又以宋封太尉忠義之感人深矣

游奉仙觀詩

大觀己丑六月立魯日損撰正書在濟源

詩爲七言絕句因陪道淳左藏遊奉仙觀感二魯真人得道之所而作也詩與字亦不工

贈魏王告祠勅

政和三年五月立李昌邦行書在汝州

此秦王廷美追封魏王勅以元符三年三月十四日下政和三年五月初十日管轄添修墳園吳口趙令詒立石字體佚蕩開米芾之先矣

浮邱公靈泉記

政和四年五月立張挺撰張當世正書在偃師

碑云崧高之下曰緱氏山距山不遠遺冢具存民俗傳爲浮邱藏劍之所卽其巔構祠以祀焉又云政和二年夏月泉出庭下人初易之俄鵲鳧泳者輒死病者請禱飲之卽愈按其

泉今在縣南三十五里既而久涸乾隆初復出也

頓逢原題名

政和口年刻頓逢原正書在桐柏淮源廟

題云後廿有一口子逢原以從事口口口事奉郡檄春祭  
祠下口覽先君口口留字感愴久之政和口口正月二日頓  
逢原書房準口實刻

豐澤廟封康顯侯勅并記

宣和元年三月立黃翰撰并行書在濬縣

碑上爲勅下爲記勅以政和八年閏九月十三日下署太師  
魯國公臣京免書及諸臣名尙書吏部告印下記徐公由尙  
書郎泄二千石禱雨有應奏請封爵之事翰時爲州學教授  
其書法絕類蘇文忠軾豈以翰官卑名不逮之與宋時勅牒

體例具見于此足資掌故也

### 蔡興宗題名

宣和元年十二月刻正書在桐柏淮源廟

題名宣和元年十二月庚子歲立春日郡從事蔡興宗奉御  
名祝詞致祭于淮濱長源王廟下其文右行

### 白金泉銘

宣和乙酉立徐閔中撰正書在濬縣

碑云汶山之陰厥有一泉出石亭閒世傳玉女修真之地泉  
之東有巨阪伏如瓦溝號拖裙石而泉獨無名予慨然口筆  
題曰白金又云玉女姓氏不顯于世按明一統志云紫金山  
在濬縣東北六里大岬山東相傳古玉女修真于此上有玉  
女觀白金泉拖裙石玉女巖仙跡然則汶山卽紫金山矣俗

失其名考乙酉爲建中靖國四年而以宣和紀歲不可解也  
封濟源忠護王勅

宣和七年九月立書在濟源

勅云屬者寇發鄰郡將犯縣境邑人奔走禱于爾大神雷雨  
遂興沁河有湯池之險旌旗歛列南岸象羽林之嚴賊徒褫  
魄以咸奔閭里按堵而相慶未署起復少宰兼中書侍郎臣  
邦彥宣中書侍郎臣張邦昌奉中書舍人臣莫儔行蓋宣和  
六年郡縣守吏往往以軍法誅民河北盜起七年正月詔告  
諭河北河東盜賊赦罪放租然當時國家懦弱徒恃禱神布  
恩以爲弭盜之術則盜去而金人來矣東都事畧云宣和三  
年張邦昌中書侍郎六年夏四月李邦彥以父憂起復九月  
李邦彥少宰兼中書侍郎正與碑合

題觀魚軒詩

韓琦撰并正書在安陽

碑無年月不云并書玩其字跡卽琦筆法也琦築忘機堂在彰德府治北前有狎鷗亭又前有觀魚亭

伏羲廟題太昊陵字

行書在陳州府治

伏羲廟後有土敦高二丈許前有碑題爲太昊伏羲氏陵俗傳朱子書或云蘇轍書攷史記司馬貞三皇本紀注云按皇甫謐伏羲葬南郡或曰冢在山陽高平之西也則伏羲陵不在陳州府治水經注沙水又東南逕陳城北故陳國也伏羲神農並都之城東北三十許里猶有羲城元和郡縣志云宛邱縣八卦臺及壇在縣北一里古伏羲氏始講八卦于此則

此乃伏羲治所及畫卦之臺不得指爲陵也又按寶刻類編有光化中伏羲廟碑孫命撰趙穀書并篆額亦不云陵今祀典祭在此者承宋元之舊亦以南郡高平之陵旣失古帝神靈無所不在歟湯陵在偃師而祭汾州周文王武王陵在長安而祭咸陽亦有舉莫廢之義也伏羲廟旣古今周覽庭宇并光化碑亦已亡失蓋修廟時類皆磨去舊文刻近人碑記殊可惜也

### 南禪寺經幢

行書在汝州

幢字甚摩滅後一行云大宋口口口歲次乙卯二月壬子朔廿一日夫口劍州衙內指揮使張口建餘不可讀寶應寺在汝州治東南元時亦名南禪寺世傳唐開元初建明洪武



初重修置僧正司焉

廣慧寺石幢

正書在汝州

幢字漫滅可辨者云初五日遷化于汝州等慈禪口又云同

業龍興寺七祖下沙門景規又云六月丙子朔二十四日其

上正缺故不能辨其爲唐爲宋也七祖者唐元宗所謚貞禪

師之號

法雲寺石鼎文

行書在獲嘉縣

文甚摩滅諦視其殘字乃是行書心經前又有正書有法郭

二字可辨其爲唐宋物不可知矣方志載明洪治閱僧鑑蓮

修此寺並徙石佛石鼎各一座鼎柱刻慶歷四年則此經宋

時所書縣官未揭柱上款識來耳心經字體與懷仁所集王  
右軍書正同

中州金石記卷四終

中州金石記卷五

遷表館於觀音殿院有都天宮觀河南等處重修觀音殿碑

金

朗然子詩

天德二年正月立劉希岳撰王琳正書在洛陽樓霞莊

朗然子卽劉希岳字望嵩章水舉人棄儒入道碑云朗然子者昔唐通元觀主也事跡靈異修煉非凡隱世百載至宋端拱年於桃花坊白日昇天矣勅改名集真觀有遺詩二十首於世至政和元年觀主道士張道言小師周抱真立石後改名萬靈朝元宮值兵火損壞碑跡於天德二年正月初五日本宮道士趙隱微尋獲元昏碑一本道士張道冲重刻石葆光道人王琳書今觀其序及詩甚劣而所說甚奇異將道士

造作其事銜世者邪予覽金石之例凡爲道家作志銘于其卒也必曰白日昇天或曰蛻去猶爲釋氏立詞曰圓寂曰涅槃之類卽儒家稱卒與終耳後世不解讀其碑則以爲仙也晉書稱葛稚川吳時學道得仙亦史家誤會碑碣之文歟常樂寺重修三世佛殿碑

正隆四年四月立胡礪撰翟炳正書郭源篆額在武安

碑云鼓山南則滏水出焉上有二石如鼓形世傳鼓鳴則有兵起質諸傳記北齊之末此鼓常鳴而齊爲周所併隋文帝末年鼓又自鳴而唐代隋以興一名神鉦按太平寰宇記云滏陽縣鼓山亦名滏山宋永初古今山川記云鼓山有石鼓形二所南北相當俗語云南鼓北鼓相去十五里冀州圖經云鄴城西有石鼓鼓自鳴卽有兵魏都賦云神鉦迢遞於高

巒是也高齊末鼓鳴未幾云鄴城有兵而齊滅隋文季年又  
鳴聞數百里也正與碑合予按鼓山卽北山經神囷之山黃  
水溢水出者矣豈神囷卽以石鼓形似得名亦魏都賦之神  
鉦蓋可証山經非不稽之談乎碑又引齊志文宣使人騎駱  
駝取經函之事又云文宣常自鄴都詣晉陽往來山下故起  
離宮以備巡幸於此山腹見數百聖僧行道遂開三石室刻  
諸尊儀因建此寺初名石窟後主天統開改智力宋嘉祐中  
復更爲常樂又云自皇統八年九月乙亥訖天德二年六月  
甲寅殿成貞元二年正月癸亥始立塑象則記金代修葺之  
時也其字體有姿致漸與米芾相似篆額亦工

剏修泉池記

大定五年五月立李綸撰王克正書在河內

碑云河內郡之西北有大雄山山之陽數里有唐堯古祠數  
泉出於祠下南底于沁上下數十里按卽今所謂堯池者也  
其水不知當水經注之何名後人造爲唐堯担掌之說其可  
笑也

濟源縣寶峯院記

大定十三年五月立正書在濟源

碑爲天聖七年楊延方重營棟宇植以松柏大定三年勅賜  
寶峯禪院而作也

御題寺唐德宗詩碣

大定十六年立許安仁記并書在御題寺

額正書云御題寺唐德宗天章碑下爲五律詩一首知年月  
人名者据黃叔璥中州金石攷也

重修中嶽廟碑

大定二十二年十月立黃久約撰郝史正書党懷英篆額在  
登封

碑述大定重修中嶽廟始於十六年四月丁未絕手於十八  
年六月戊子二十二年十月庚申制詔臣久約書其事于石  
按黃久約字彌大東平須城人也金史有傳稱其雋朗敢言  
性友弟爲文典贍云碑作郝史撰尙可識而庚子銷夏記云  
書者止云臣郝不著其名石又完好非泐也蓋未諦視之党  
懷英金史有傳稱其工篆籀當時稱爲第一童鈺河南府志  
云中嶽廟按唐韋行儉廟記元魏徙廟于嶽之東南卽黃久  
約所謂舊有廟在東南嶺上者也行儉謂元魏徙廟而黃以  
爲莫知其經始記文偶疏耳至黃謂魏大安徙于神蓋山韋



則不及合觀二記則元魏兩徙廟也初徙于東南嶺上又徙于神蓋山所謂東嶺者今廟東南玉案峯也所謂神蓋山者今廟東黃蓋峯也又峻極中峯上傳爲元魏中嶽廟遺址是又曾建廟山上矣童鉦字二樹山陰人所修方志典核可觀近今著述之善者

崑崙山長真譚先生題白骨詩

大定癸卯甲子月立程發正書在洛陽

碑上圖譚道士隨一童及枯體委地形下爲題白骨七詩詞甚淺俗後有雲溪菴建皇甫道淵衆立石譚先生見元史邱處機傳云處機年十九爲全真學於寧海之崑崙山與馬鉦譚處端劉處元王處一郝大通孫不二同師重陽王真久金宋之季俱遣使來召不赴此卽譚處端也道藏中有譚先生

水雲集三卷亦載骷髏落魄歌

安陽縣乞伏邨重修唐帝廟記

明昌六年六月立趙秉文撰并正書題額在安陽

碑云相之西六十里而遠有聚落曰乞伏帝之祠在焉西挹  
太行北枕漳水古木森然上閩漢晉又云相古邑也若殷三  
甲之居相文王之居羨里皆有祠廟載在祠典獨唐帝之祠  
義若無所出予按太平寰宇記云永定縣本漢內黃縣地隋  
開皇十八年改爲堯城縣因堯所居之城爲名唐末改爲永  
定縣又云丹朱墓在縣東一里堯之子也攷永定廢縣在今  
府城東四十里宋省入安陽縣則其地祠堯實當以此丹朱  
墓亦在府東南巖邨趙秉文不能遠考故以爲義無所出耳  
南宋金元以來文人多而學人少往往如此獨怪金史稱秉

文自幼至老未嘗一日廢書之說也

緱山詩

承安丁巳十一月立淳南老人撰草書在偃師

詩云緱山突兀上空虛古柏森森幾萬株一自吹笙仙去後  
乘鸞曾返故鄉無題云淳南老人卽王若虛也金史有傳者  
丁巳蓋承安之二年

魏夫人賜靜應廟牒

承安四年五月立正書在河內

此知縣事陳崇祈雨應驗而奏賜題額也牒爲崇寧時所下  
後有司空兼左僕射左光祿大夫右丞吳詵銜及押至承安  
時乃始上石

王大尉奉使齋降御香魏夫人祠紀事碑

泰和元年七月立康國材正書在河內

碑以宋政和八年書金泰和元年立石字大二寸而不工諱視此碑隱隱有字蹟爲金人磨去重刻此文者凡古陵廟修造之日世俗必以古碑刻新文其有祭告之處尤甚最爲惡習不意金代有然識字之人庶幾戒此

投簡卜日碑

泰和五年正月立彭珣撰并行書

時珣同王知常奉旨卜日故有此刻

何友直題名

嘉定丙子四月刻何友直行書在桐柏淮源廟

題云嘉定丙子四月初九襄陽刊石何友直因謁淮源王祠下後旬日歸與數友言別臨行不覓黠然後會無期謾刻於

石不可無紀覺字作竟蓋省筆文又交之譌也

乾元禪寺杲公禪師塔銘

興定二年九月立樂誥甫撰釋性英正書在洛陽

碑文與字頗劣述禪師慧杲俗姓張孝事二親二親既喪遂  
求出家則其人有可取也又述弟子十二分骨建塔銘亦云  
其徒分骨塔於龍門釋氏之流獎甚矣銘以腳與照爲韻畢  
與逝爲韻必緩讀腳字畢字二音以從之今北人讀入聲多  
似去雖是俗音不足爲据然漢魏往往有之自有沈約四聲  
則不合于古韻不通于方語矣

重刻白樂天詩

元光元年九月立賈獻臣正書在濟源

詩爲濟源山水好老尹知之久五古一首後題太和五年九

月二十六日後云賈獻臣重錄是居易有原刻或失于宋金時也獻臣時遙授昌武軍節度判官

葉令劉從益惠政碑

正大四年八月立趙秉文撰并行書在葉縣

從益官葉有惠政召授應奉翰林文字踰月疾卒秉文爲作碑後有悼騷一首字體奇偉可觀趙秉文金史有傳云字周臣磁州滏陽人也登大定二十五年進士第興定元年拜禮部尙書兼侍讀學士同修國史知集賢院事哀宗卽位改翰林學士自幼至老未嘗一日廢書文長于辨析小詩精絕字畫則草書尤道勁劉祁歸潛志云趙秉文幼年詩與書皆法子端後更學太白東坡字兼古今諸家學及晚年書大進自號閑閑居士云

濟瀆靈應記

正大五年二月立韓時舉撰并正書梁邦瑞篆額在濟源  
碑述葛佑銜命降香決辰得雨之事稱爲濟瀆顯祐清源王  
按金史禮志云明昌閒封濟爲清源王此有顯祐二字是史  
脫文也

重修濟瀆廟記

正大五年六月立種竹老人撰梁邦瑞正書在濟源  
碑爲帝遣高佑祈禱致祭有神物出海領紙吞酒朝闕如謝  
而作

齊徐州觀察使河南路安撫使孟邦雄墓志

阜昌四年立李果卿撰李肅正書在偃師

邦雄字彥國西京永安人宋靖康建炎間嗣王走江浙乃招

集亡命旬月間併萬人號曰義師保全一方力拒虜寇  
留守使司嘉其忠義便宜借補進義校尉歷官至忠州防禦  
使入齊阜昌三年官至徐州觀察使知河南軍府事西京密  
守河南府路安撫使馬步軍總管兼管內勸農使明年正月  
西賊叛逆被執不屈父恩被傷致殞子安世同日被禍贈通  
侍大夫碑新出土字蹟工秀得虞褚規模良可愛也阜昌爲  
劉豫年號豫以宋建炎四年爲金所立故附置于此

元

賜邱神仙手詔碣

大祖時立李口顏不花口在汝州

按碑爲成吉思皇帝訪聞邱師先生隱山東舊境選差近侍  
官備輕騎素車邀之因頒此詔也元祕史云成吉思哈罕成



吉思釋爲太祖哈罕釋爲皇帝印神仙者各處機元史有傳  
云栖霞人自號長春子金宋之末遣使來召不赴歲己卯太  
祖自乃蠻命近臣札八兒劉仲祿特詔求之處機一日忽語  
其徒使促裝曰天使來召我我當往翌日二人者至處機乃  
與弟子十有八人同往見焉然則此卽歲己卯詔也是爲宋  
祥興二年

### 勅公禪師塔銘

憲宗八年八月立口至輦撰僧從印正書在林縣

碑題憲宗八年卽寶祐六年也云蒙哥皇帝卽位七年蒙哥  
者憲宗諱生時有黃忽荅部知天象者言帝後必大貴故以  
蒙哥爲名蒙哥華言長生也見元史碑述勅公道行勅公洛  
州洛水人姓張氏前題云九門山泉老口至輦撰

祭濟瀆記

中統元年八月立李國忠撰史芝書丹并篆額在濟源

碑列銜稱儒生史芝亦前所未聞

少中大夫御史程震神道碑

中統四年七月立元好問撰李微正書李冶題額在偃師

碑云祔於金昌府芝田縣官注里少中君之新塋按曹植洛神賦云秣馬乎芝田太平寰宇記云緱氏縣芝田鄉在縣北金史地里志河南府興定元年八月曰金昌縣有芝田宋冬永安貞元元年更

濟祠投龍簡靈應記

中統五年四月立李口國撰劉鐸正書在濟源

碑述真人張誠明設醮投奠靈應之事

許熙載神道碑

至元四年八月立歐陽元撰趙孟頫正書并篆額在彰德府城西北

熙載有壬之父有壬既貴乃爲父立碑張起巖爲行狀馬祖常爲壙志歐陽元爲此碑三人皆熙載同年進士孟頫字亦極工整是生平經意之作古人書撰碑碣但自書銜無書通家子姪等字樣今人則用之何積習之難反也

重修天壇靈都萬壽宮碑

至元四年十月立口或口撰史天祐正書并篆額在濟源

碑云吉靈都萬壽宮此本唐玉真公主受道登真之所凡文人爲道家作碑志稱登真蓋言死耳後遂謠傳爲升僊謬矣下述張志謹道行及修建院宇之事

紫虛元君廣惠碑

至元五年二月立石瑄撰李德存正書并篆額在河內

碑文甚陋稱唐路敬淳碑云任城魏陽之女脫元字云注子於王禮乃玉札之誤又云淵德豚仁出禮記亦誤以豚爲肫又云亂之以詩下又云銘曰皆無文理其篆額似是符籙凡八字意會其六曰大元口口廣惠之碑予幕中多識篆籀古文之士然此卒莫能辨見其字體之不經也

懷慶路監郡脫來公祀濟瀆記

至元五年九月立郭安貞行書趙初題額在濟源

碑述脫來公禱雨有驗之事文當是安貞所撰

僉憲楊得春靈應記

至元七年二月立蘇棟撰郭居仁行書左世榮題額在濟源

碑爲春祭瀆有葡萄釀堊泛出波面而作也

皇太子燕王香碑記

至元九年二月立李惟深撰并正書在濟源

碑似是磨古刻而重書者橫行有太常寺三字甚方正疑唐碑也

代祀濟瀆投龍簡記

至元十二年三月立袁志遠撰史芝正書在濟源

碑述御也先祀廟投建齋醮之事字甚少

洛京緱山改建昇仙宮記

至元十五年二月立杜成寬撰張瑜正書并篆額在偃師

碑云府店緱山乃周靈王太子喬仙君飛昇之地也始册原

廟揚號宥天時有前朝就爲觀額廟處仙山之末觀居緱嶺

之阿按班固地里志云緱氏有仙人祠水經注云休水又逕  
延壽城南卽緱氏城也城有仙人祠謂之仙人觀太平寰宇  
記云緱山縣仙鶴觀在縣東三里當卽漢以來相傳之廟矣  
續博物志稱天寶中太子陵仙鶴觀每年九月三日夜有道  
士一人得仙張竭忠爲令不之信陰令二勇士執兵覘之至  
三更有一黑虎入觀來銜一道士於是申府請弓矢大獵石  
穴中格殺數虎其觀遂廢爲陵使之居亦此地也碑爲五祖  
真人令杜德元就山開教德元與楊德元經營起造而作蓋  
元時去唐代漸遠人忘虎患而道教復興矣

皇子北安王降香記

至元二十三年正月立傳夢弼正書在濟源

碑述致祭瀆廟甘澍感應之事書法亦不工

望嵩樓記

至元二十四年五月立尙野撰正書在汝州州署壁間

尙野時爲汝州判官因爲此記字亦端雅記稱文大方獨見  
劉禹錫送寥寥謀詩有望嵩樓上忽相見遂以爲始建自唐  
李廷老以望之不見而有汝陽之易南陽府知府王伯堅勸  
農至此稅駕斯樓云云尙野記之此石出于乾隆辛酉春因  
修學宮得于土中知州宋名立移置署壁并跋後按宋張耒  
詩有云臨汝城中春雪消望嵩樓上對峒峩已披氛露看孤  
秀更挾春寒上沈寥亦卽謂此樓也樓在今州治西子城內  
風景甚勝

濟瀆靈異記

至元十四年重九日立王光祖撰并正書柴文煥題額在濟

源濟濟廟

碑記南京路宣慰同知忽辛先莅事閒有恩州劉姓直赴訟  
庭拜禮其人歿三日復生云見冥官爲誤攝放還早隸等徵  
問錢物引至南京宣尉司同知平正庫內借錢一百五十貫  
稱如達陽間同知處禮一百五十拜餉馬百日可償所借錢  
債於是悉依前語拜禮餉馬還家亦流俗相傳之事也文與  
字俱不甚工

馮帖題名

至元二十一年十二月刻馮帖正書在桐柏淮源廟

題云余按覈荆豫至南陽同知府陳君子棋朝請敬謁祠下  
時至元甲申冬十一月十有八日也中山馮帖題書吏毛倫  
侍行



加封濟瀆濟源善濟王勅并記

至元二十八年四月立徵良佐正書在濟源

碑云遣元門掌教大宗師輔元履道元逸真人張志仙者道陵之裔也勅上爲國書下正書以二月下四月乃記之徵良佐下缺二字云書之敬書疑所缺者乃換并二字也

宏鼓大師修白馬寺詩

至元三十年九月立商挺撰正書在洛陽白馬寺

詩七古音節琅琅甚可誦也後有奉別龍川大士七律一首通慧大師塔記

至元三十一年五月立宋天祿正書在汝州

其文駢體後有七言詩句辭甚鄙俚當是市井之所爲寫惱爲惱尤可怪也

濟瀆靈貺碑

大德三年四月立史芝撰張秉彝正書高凝題額在濟源  
碑述劉道真祀瀆得錦潘尊酒之異都穆云濟瀆東池俗傳  
間能出物以應人之求然率始于三月至四月望而止餘月  
則否蓋春夏之交泉脈騰沸而濟尤勁疾物隨沸而上予之  
遊也默禱于神願出物以彰靈異道士云隆寒水泉不動物  
不能上予笑曰豈有靈神而畏寒者乎爾姑爲我禱久之物  
竟不能出道士之言始信而世俗所云皆誕妄也

重修太初宮碑

大德四年九月立王道明撰高從謙正書劉懷篆額在靈寶  
碑述道士張志明屎記文宋真人等興修之事有云尹真人  
殿前二小石刻一云唐開元二十九年元元降丹鳳樓告云

錫汝符在尹喜宅求而得之水際上有天篆文曰千載天寶  
靈符元宋因受開元天寶之號額爲天寶觀今訪其刻亦不  
得矣

老子故宅十方聖祖之宮碑

大德六年三月立高凝撰王道亨正書在靈寶

元和郡縣志云桃林縣天寶元年于縣南古函谷關尹真人  
宅掘得天寶靈符遂改縣爲靈寶則此縣有尹喜宅非老子  
宅也碑亦辨其事而云豈尹喜故宅老子著書所也

靈都萬壽宮圖并陰

乙巳年八月立在濟源

碑二格上層爲圖下層爲披雲宋天師詩咏者爲憇鶴臺金  
蓮泉唐元宗御書額不老泉平陽洞鳴鐘批檄杖石仙人臺

八題及前後二詩無題共絕句十首陰亦二格上層圖一道  
士下層勅旨云張先生者卽志謹也乙巳爲成宗大德九年  
終元之世無乙巳故定以爲大德時

漁莊記

大德十年閏正月立陳儼撰趙孟頫行書在安陽

碑云吾雲卿總管韓侯之別墅也去太行東麓三舍洹水界  
其下號萬金渠折北而東抵相十里而近切東涘百許步卽  
其地也云云洹水今名安陽河萬金渠在安陽西北二十里  
源出竇山經府城西分注東南溉田世傳魏武所開又云其  
利可抵萬金故以名也予按鄴故多水利自西門豹始隋唐  
宋元明因之其在安陽內黃湯陰臨漳武安林縣涉縣者至  
今往往而有守土官其如何疏濬裨益于民則考古之學通

于政事矣

南禪寺粧鑿佛象記

大德九年九月立解澤民撰在汝州

碑爲汝州達魯花赤阿的彌試下車之日以愛民爲本境內  
大治施俸金粧鑿釋伽三聖及諸佛象而作也後爲元國書  
如前文無書人名而但云嚴秀刻疑卽解澤民并書者也  
百里嵩墓碑

大德十年八月立高建撰岳正正書隸額在封邱

碑云封邱縣之東北僅七里有廟焉世以爲百里嵩廟又稱  
廟址卽其使君冢坐按太平寰宇記云封邱縣百里嵩墓在  
縣東七里後漢書嵩字景山陳留封邱人爲徐州刺史時早  
嵩乃傳車巡部所到屬縣膏雨隨車卒葬于此與碑所稱正

合墓今在縣城東五里廟在墓前至今禱雨有驗此碑卽因  
縣尹劉循禱雨靈應而作也廟尙多明時所立碑茲不錄  
內鄉縣創建宣聖廟學記

大德十年十一月立暢師文撰并正書成資篆額在內鄉  
碑云中元以來社請學師教習童蒙誦小學四書此小學  
者非漢人之所謂小學也朱彝尊云朱儒持論以灑埽應對  
進退爲小學由是今之塾師說文玉篇皆置不問兔園冊子  
專攷稽于梅氏字彙張字正字通而小學放絕焉師文蓋趨  
逐風氣之語故又痛斥枝章析句箋釋蟲魚欲爲治經博士  
之人按孔子云爾雅以觀于政足以辨言又云多識鳥獸草  
木之名師文薄有文名何乃與聖人之言相背若此故元明  
兩代遂少通經博物之士矣

國書二碑

中州金石記卷五

古

武宗時立在林縣

一碑爲成吉思皇帝月可斛皇帝薛禪皇帝完澤禿皇帝曲律皇帝宣諭寶嚴寺太平寺僧聖旨後云牛兒年七月一碑上爲成吉思皇帝宣諭寶嚴寺乾明寺龍興寺僧聖旨云雞兒年中爲國書下爲成吉思皇帝月古斛皇帝薛禪皇帝宣諭寺僧依著在先聖旨体例聖旨後云狗兒年三月成吉思太祖尊號月可斛薛禪完澤禿曲律世祖成宗武宗之謚身後追上也當時國語如此元史月古斛作窩闊台泰安府東嶽廟聖旨碑又作月古台完澤禿作完澤篤又作完者都此碑作月可斛又一碑作月古斛皆聲相近元國語重音不重字故也雞兒年狗兒年之屬元祕史亦悉以此紀歲卽十二

屬是也以俺代我者音之轉甚麼卽只麼亦急讀爲什麼音卽唐人之遮莫而釋唐詩遮莫者多云儘教疑非予以爲皆者字之緩讀爲二音說文云者別事詞也俗或書爲這

石堂山麻衣道場重建普濟堂碑

至大二年三月立朱象先撰并正書在內鄉

碑述陳搏隱武當過此山龍君洞從麻衣叟論易之事又云世傳麻衣心易二十四章希夷爲之解李壽翁張南軒皆有跋語而朱文公乃以爲戴師愈贗作而力辨之又云是善非空言也實用具焉此道士尊崇私說以衒世之計也陳搏一隱者耳世多造作異事以歸之皆史所無史惟載其教种放不娶遂無子此其大失是以吾儒束身名教不肖爲瑰異高尚之行以致流俗附會其事損傷風化也



付紫微宮旨碑

至大二年三月立正書在濟源

碑為元國語而月古解皇帝作月古反此字見元人曲譜以為好反之事訓反為惡也

重修天壇碑銘

大朝乙酉歲建子月立李志全撰并正書白志明篆額在濟源

碑述伊陽瑩然子周鍊師住持營建之事紀歲稱大朝已酉建子月蓋武宗至大二年也終元之世更無已酉故定以為至大云

天壇十方大紫微宮結廡殿記

大朝庚戌歲八月立李志全撰錢志口正書在濟源

碑述沁州杜德康及夫人王體善施舍之事云杜侯一門自於長春國師几前親受法訓長春卽邱處機日號也元史有傳紀歲稱大朝庚戌蓋武宗至大三年也

公主皇后付靈都宮懿旨碑

庚戌年五月立正書

碑述靈都宮宗主寧神子張志謹賜廣元真人名號之事庚戌者至大三年也終元之世惟此庚戌故定以爲至大時

太易道人書篆碑

至大辛亥二月立上隸書下正書在內鄉

碑上層爲圓格言道與性及易理皆不經之談似是而非之論下層橫題云嗣漢三十代天師虛靖先生心說其文或用老莊之言又礫釋氏真如及天堂地獄之說又牽涉吾儒身

心勿使須臾離之語蓋是時風氣以釋氏之學談性命之習成矣此尤其妄作者自題內觀養素太易道人書篆而上層所書似正似隸下層竟是正書是并字體亦不辨之人也

### 重修顯聖廟碑

皇慶元年十月立郭秉仁撰郭淵篆書在闔鄉

碑云神之原廟者按寧州圖經在陽周東西四十里要册鎮鳳凰山龍安掌湫週迴一百九十步又云唐時有神與木處郭仕廉相符由是廟興又云漢與朝那俱設署曹唐太宗重修元宗增修按封禪書湫淵祠朝那地里志朝那有湫淵祠括地志湫谷水源出寧州安定此其遺制也碑又云是廟者建基於宋復興於聖元卽關東全節之行宮蓋闔鄉之祠創始于宋而非古廟秉仁自云郭令公二十代孫其字不甚工

有云元宗以金瓶汲淵又云景龍閒復勅內謁者馮媵玉篇  
瓶是朱切小覺也但無媵字近惟易緯有耻字音止今字書  
以耻爲恥未知是一字否其寫闔鄉字作閔與今閔字皆爲  
別體說文闔低目視也从具門聲宏農湖縣有闔鄉此字以  
門爲聲玉篇入門部大謬下有閔字云同上俗今印文正作  
閔字不知世俗何由通作閔也閔亦閔之譌形

涇溪先生遊玉川詩

皇慶二年十月立王公孺換男笱正書在濟源

詩爲七言律時笱爲懷孟路總管府判官邀其父與趙濟民  
謁清源祠而作也

古槐圖記

皇慶癸丑立童童寫圖一百五換并正書在滎陽

一百五時爲達魯花赤述其見郭東古槐殊類老口俗傳漢朝曾來此樹下口有閑閑公詩在焉又述大丞相卜麟吉臺嫡子童童成律詩一章及真形俱寫于壁是以命工模勒其畫將詩刻于石又云自漢至亡金正大禩一千四百三十四禩至皇慶癸丑一千五百二十一禩蓋記漢槐甲子也

古槐詩

皇慶癸丑立童童換并書在榮陽

詩云龍幡天矯興雷雨虎踞離奇隱鬼神隆進千年成蟻夢空餘古樹老榮濱後題集賢侍讀學士中奉大夫童童馳驛之河南道經榮邑觀路傍漢朝老槐感而賦此時皇慶元年十一月十九日也一百五稱爲雄章傑句未免譽之過當予以爲蟻夢乃唐時故事今用以說隆準是猶賦昭君詩用蘭

麴之病與

重建奉仙觀記

延祐元年五月立劉大明撰姜道安正書并篆額在內鄉  
碑記道人王志固王道明前後修觀之事云所謂奉仙觀者  
古人不徒名也而必有以奉其所以爲仙者而取焉則是時  
志乘久已缺畧矣前又述歷代仙真之名文甚淺俗

投龍簡記

延祐元年八月立周應極撰趙孟頫行書郭貫篆額在濟源  
碑爲帝命張留孫建醮復命集賢司直周應極投簡濟瀆而  
作也留孫者龍虎山三十九代張真人嗣成之徒信州貴溪  
人元史正一天師傳稱至元十三年從天師張宗演入朝遂  
留侍闕下又稱卽命留孫爲天師留孫固辭不敢當乃號之

上卿十五年授元教大宗師大德中加號元教大宗師同知  
集賢院道教事武宗立陞大真人知集賢院位大學士上尋  
又加特進進開府儀同三司加號輔成贊化保運元教大宗  
師至治元年十二月卒今碑稱爲特進上卿元教大宗師志  
道宏教沖元仁靖大真人與史不甚合未知何故張真人之  
尊號自宋元始乃至官其父旌其鄉亦已過矣元史又有世  
祖嘗命取其祖天師所傳玉印寶劍觀之曰果有神明之相  
等語攷龍虎山印文曰陽平治都君印茅山印文曰九老仙  
都君印皆九曲文茅山印乃宋徽宗賜道士劉混康者有碑  
刻可証龍虎山印篆文玉質正與之同知爲一時所賜無疑  
今世傳茅山印爲卞和玉李斯刻何異以龍虎山印爲道陵  
所傳漢物邪因元史之言失實故附記于此郭貫元史有傳

云至治元年爲集賢大學士追封蔡國公謚文憲精於篆籀  
當世冊寶碑額多出其手

### 投奠龍簡記

延祐二年十月立行書隸額在濟源

碑無書人名爲特命特進上卿真人張留孫建醮及遣侍讀  
學士李侗投簡濟瀆而作也字蹟與元年投龍簡記正同其  
爲趙孟頫書無疑

### 重修濟瀆廟碑

延祐三年九月立王公孺撰王笱正書蕭珍題額在濟源

碑爲太后遣使祭廟及命總監懷孟路事臣混沃耳不花修  
完祠宇而作也其文旣美無故實字亦甚劣文中不花字一  
又作不華者元時重音而不重字也故禪經譯本文字各異



碑字空缺處有監察御史藍田題名隸書

重修宣聖廟記

延祐四年五月立宋湜撰韓冲正書林鶚篆額在偃師

碑云商有三亳昔成湯所都口號曰殷即西亳之地按書序云湯始居亳從先王居鄭康成注云亳今河南偃師今有高莊在治西五里即高辛故都也皇甫謐好為異論以為湯都當在穀熟不當在偃師穀熟即今商邱乃湯始居之地後遷于偃師耳謐知其一失其一矣碑稱武王伐紂築城于此息偃戎師後置縣事因名曰偃師說與通典元和郡州志台偃師故周縣徐廣注史記云周比亡之時有之

元刻比干銅盤銘

延祐五年正月摹篆書在汲縣墓上

薛尚功鐘鼎款識云唐開元中偃師縣土人耕地得此盤篆文甚奇古張邦基墨莊漫錄又云政和間求三代鼎彝器遣人于鳳翔府破商比干墓得銅盤徑二尺餘中有款識一十六字按諸書傳比干墓在汲縣而太平寰宇記云偃師縣比干墓在縣西北一十五里疑已譌傳鳳翔之墓尤謬其文頗似李斯傳國璽絲密茂美當是秦漢人所爲亦必非商物也童鈺稱舊偃師志云何比干汝陰人漢武時廷尉墓中以銅盤爲誌出于唐開元中後傳自汝帖延祐間衛輝路學正王公說摹石推官張淑記之明萬歷十五年周思宸又重摹上石皆在汲縣

追封隴西郡伯李彬碑

延祐五年四月立元明善撰趙孟頫書在許州

按碑是李謙追封其父彬并述事刻石之辭彬隸大將軍岳  
珍戲下從入宋既二年大旗南指岳珍率德安人十許萬來  
歸元帥第功以爲計口都尉彬之行似無可述豈爲戲下將  
固當從人指授不得以入元爲嫌邪戲下卽麾下說文云戲  
三軍之偏也从戈盧聲史記正義引許君注注南子云戲大  
旗也此猶用古字今人則見而疾之矣

聖旨頒降御香記

至治二年二月立僧智明撰鮑安仁正書并題額在濟源

其文與字頗劣

東嶽行宮碑

至治二年十二月立陳霄撰芮秉彝正書薛士廉題額在汝

州

碑述修廟之事云始構之由漫不可考獨有慶歷五祀孔敞所作重修碑刻在焉又云唐宋以還封勅之隆至與天子等逮我聖元卽其故封復加大生之號如碑云云則是宋元以來卽所在有東嶽行宮矣東方生道家因作爲東嶽注生之說民樂得而祠之故立廟無限極

周天大醮投龍簡記

泰定元年五月立正書在濟源

碑爲詔吳全節等設醮蔡天祐等投奠而作也

代祀禱雨感應記

泰定二年三月立董良弼撰正書在濟源

碑述遣劉紹祖及定定致祭之異

大龍泉寶雲寺碑

秦定二年七月立趙孟頫撰釋德謙正書并篆額在汝州  
碑云寺之經始莫詳何代父老皆云昔光武憇此人馬渴之  
俄有清泉沸湧而出後人建寺於此因以名焉其事甚古而  
不見史籍蓋僧人造作此說以衒俗者矣字甚工整可觀  
龍飛祀瀆海記

天歷元年九月立黃奎撰并行書在濟源

碑述帝遣范完澤及奎致祭之事

淮源廟鉄獅子識

天歷二年二月刻行書在桐柏

題云唐州口卿口口爐口况文炳口發虔心於桐柏山淮濱  
廟內鑄造獅子一隻口充鎮口大元天歷二年二月

李黼題名

天歷三年刻正書在桐柏淮源廟

題云天歷三年春天子以早荒致誠嶽瀆大常同簽禿堅里  
不花賜進士及第翰林修撰李黼代祀祠下靈貺昭荅普我  
惠澤

張策題名

至順三年七月刻正書在桐柏淮源廟

題云奉詔代祀淮靈牲肥酒苾禮嚴祀恭瞻望明神髣髴如  
在也是亦可書有元至順三年七月十二日前監察御史張  
策公畧謹識國子伴讀王良貴實預其行

長明燈記

至順癸酉正月立僧福佑撰正書在白馬寺

碑記陝西行御史臺大夫珙珞博華造寺施鈔充長明燈費

之事字亦有姿致攷癸酉爲元統元年至順之四年也

洛京白馬寺祖庭記

至順四年九月立僧文才撰正書在白馬寺

攷至順無四年至順之四年卽元統之元年也字甚工麗驗其筆蹟實趙孟頫書

偃師伯王輔嗣墓碣

元統二年十月立吳炳隸書在偃師

題云偃師伯王輔嗣之墓按水經注載王陸詩敘機初入洛次河南之偃師時忽結陰望道左若民居者因往逗宿見一少年姿神端遠與機言元機服其能而無以酬折前致一辨機題緯古人綜檢名實此少年不甚欣解將曉去稅駕逆旅姬曰君何宿而來自東數十里無邨落止有山陽王弼墓機

乃怪悵還睇昨路空野蕤雲攢木蔽日知所遇者審玉弼也  
太平寰宇記云墓在縣南三里一統志云在縣城東今有題  
碣可証或宋治非今治也

降香祀碣

元統三年五月立于克紹撰李景參正書鮑安仁題額在濟  
源

碑以題額人居前次書人次撰人金石未有之例

重建清虛宮碑

元統三年七月立伯建爾撰趙初正書在濟源

碑有云王屋山下拒洞門十三里唐太中九年二洞柳元君  
碑今訪不可得矣

濟瀆重建靈異碑記



後至元五年九月立郭安貞換進齊建德祖正書仇濟篆額  
在濟源

碑爲忽辛先泄事有劉姓爲冥官誤攝放還而作也卽後至  
元二十四年重九日正光祖刻石所記之事錢少詹事大昕  
潛研堂金石跋考此甚悉今不書

付陽臺宮旨碑

至正元年五月立正書在口口

碑爲元國語有云成吉思皇帝月闕台皇帝薛禪皇帝完澤  
篤皇帝曲律皇帝普顏篤皇帝潔堅皇帝護都篤皇帝亦憐  
眞班皇帝攷林縣碑月闕台作月可斛完澤篤作完澤禿泰  
安府有泰定間東嶽廟聖旨碑月闕台作月古台普顏篤作  
普顏都潔堅作怯堅又有至正碑完澤寫作完者都潔堅作

格堅護都篤作忽都禿元史月閣台作窩闊台護都篤亦作  
忽都篤亦憐真班作懿璘質班蓋釋音本無定字可悟聲轉  
之法也

濟源縣重建寶峯院碑

至正三年五月立楊宗瑞撰并正書法洪篆額在濟源

碑述秀公建立佛殿之門等事餘與大定碑同

天壇山與國大陽臺重修玉皇殿記

至正四年閏二月立張琬撰劉信父正書韓應芳篆額在口  
口

碑字亦不工有云古道觀道流相傳以爲始建于唐司馬承  
禎題曰與國大陽臺萬壽宮其東有燕羅子仙洗參井右有  
承禎鍊丹爐考古蹟者亦有取焉

重刻延熹六年桐柏淮瀆廟碑

至正四年三月立吳炳隸書在濟源

碑後有記畧云漢延熹六年南陽太守刻石頌德風雨剝食其僅存者漫不可讀昔人嘗正書是文勒石廟側閒有謬誤識者病之至正四年杜君昭同知唐州旣修祠廟因以重刻舊碑謀諸僚佐以吳炳嘗習漢隸請重書舊文曰石乃以隸釋更定其誤是漢碑尙存但多漫滅後人又有正書碑炳又摹漢隸而書此碑也水經注云桐柏大復山南有淮源廟廟前有碑是南陽郭苞立又二碑並是漢延熹中守令所造文詞鄙拙殆不足觀今檢碑文亦不甚拙然卽酈道元所見也吳炳云有謬誤之碑卽隸釋所云此碑又有一正書者如華蓋誤作萃豐晝夜誤作立式凡十數字今亦不存顧炎武金

石文字記有漢桐柏淮源廟碑八分書云洪氏隸釋載此碑缺五字今拓本字畫完好而乏淳古之氣蓋唐人重刻者據朱長文碑帖考云是釋曠書釋曠開元時僧云云是誤以元吳炳重刻碑爲唐人書蓋近時揚工往往割截碑前後重刻年月書撰人名以充漢時原刻炎武亦爲所惑予聞漢碑仆地卽在吳炳碑之旁尙有數字可辨屢飭守令打本搜訪不得恐又爲近時修廟取作柱礎矣光州孫叔敖碑顧炎武亦見拓本今求之云已湮沒甚可惜也吳炳見書史會要云字彥輝汴人身安畎畝朝廷三聘不起工篆書予記憶其所書尙有河南行省增修堂廡碑記今求之不得云洪适又謂此碑奉祀齋絜字書無齋字案說文有齋字云緘也蓋齋衰本字借音爲齋絜耳

麻衣子神字銘

至正六年冬立字述魯神撰男字述魯遠正書王睿篆額在內鄉

碑述麻衣子姓李名和以穆帝昇平元年春二月十有五日  
生及唐貞觀十三年天子制表山峯等號有云南陽貢士李  
珩填諱者子書父文于沒月之後也字亦繫飭有唐人格調

孟蒂題名

至正七年正月刻正書在桐柏淮源廟

題云至正七年歲在丁亥正月十有三日唐州知州東海孟  
蒂敬拜祠下偕行者江東鄭文會棗陽黃珍也前又題云至  
正七年二月廿有三日南陽府同知節齋因奉御香拜謁祠  
下侍行者唐州知州孟蒂提舉張衆家奴府吏王從敬也

哈刺魯虎口赤墓碑

至正七年八月立趙孟頫撰舉出鉅臺書并篆額在汝州

按碑稱哈刺魯父八黑馬從四太子南伐金之殄滅公功爲多四太子者太祖第四子拖雷後追謚睿宗景襄皇帝元史有傳碑又云中原平鎮汝州子名虎口赤授臨清御河運糧官願効力邊陲授金符進階忠翊校尉南劍翼管軍千戶所達魯花赤乃踰閩嶺蒞治所卒歸葬汝州東吳氏堡之原追封梁縣男碑文不甚俊似非孟頫真筆舉出鉅臺舉字甚奇不知是舉字否也

濟瀆潮賜記碣

至正九年四月立陶黃庭撰馬道蘊正書在濟源

碑述潮賜出綉鞋諸物文與字甚劣當是市井所爲

濟瀆廟塑象題名記

至正九年五月立郝正撰并正書在濟源

碑有謹將會首芳名以勒于石云云若今市井甲乙簿字亦甚劣

重修靜應廟碑

至正十一年五月立唐顯宗撰并正書崔文定篆額在河內碑載列仙傳魏夫人事甚詳文與字俱不工篆額尤謬

蘇先生祠堂記

至正十二年口月立曹師可撰賈彬正書楊允題額在邳縣文稱東坡墓在釣臺卿上瑞里又云至順開禮部行文下邳縣于墓之東南十里薛店樹石以表之曰眉山兩蘇先生神道又云邳縣大德甲辰置祠爲縣尹楊公進名字無攷攷史

子過傳云軾卒于常州遷葬汝州郟城小峨眉山遂家潁昌  
監郡公阿蔡雅實禮感雨記

至正癸巳立元忠孝換鄭願篆額在濟瀝

碑述感雨之異後別附二行述阿蔡雅禮之德政至正癸巳  
爲十三年也

### 祀濟瀆神應記

至正十七年十月立趙恒撰并正書李炳奎篆額在濟源

碑爲太尉丞相太不花遣官致祭有池出清醞一樽之異而  
作也字亦韻秀

### 祀濟記碑

至正二十二年八月立田文舉撰鑄僧正書陳貴篆額在濟

源



陳貴篆下無額字亦金石未有之例

元付靈都萬壽宮榜

正書在口口

文爲元國語有印記花押若今時告諭矣

中州金石記卷五終

中州金石記後序

尙書弇山先生成關中金石記之後二年奉

命調撫河南又三年而復有中州金石之著自是秦涼之寶墨  
荆豫之貞珉搜采靡遺殆稱觀止亮吉于金石之學素寡究心  
而輿地之嗜幾于成癖暇日嘗假先生碑數百通校史傳闕遺  
其間得史文之誤者十之三以史文正碑石之失者亦十之一  
繼又周覽大河縱觀崇嶽南遊乎汝潁北極乎殷魏又悟乎金  
石之失有卽可以金石正之者如大坯之山尙書有洛汭之文  
爾雅標一成之目而唐天寶中河北黜陟使碑以坯爲坯遂舉  
黎陽縣南山當之雖說由臣瓚而義無左證何則昔日一成今  
亦嚴巖之石嶺昔日洛汭今乃湯湯之淇水必謂臣瓚之云足  
據則周公文命之言未可憑也惟晉灼漢書音義黎陽縣下云

黎山在其南河水經其東其山上碑云縣取山之名取水之陽  
以爲名因知魏晉以前無有以黎陽南山爲大坯者矣又汲縣  
近代比干墓碑稱酈道元水經注北魏時墓前石銘云殷太師  
比干之墓夫未蒙其寵而先有是稱此則厚誣古人取譏來哲  
惟唐李翰碑云貞觀十九年太宗東征師次殷墟下詔追贈殷  
少師比干爲太師謚曰忠烈固知飾終之典遠逮夫貞觀崇號  
之加無關於拓跋必炫其該博信此魯魚是謂生被實禍沒蒙  
虛稱非後儒之無學卽前賢之不幸也若夫滇陽之爲慎正以  
永平四年之印成皋之爲臯見于建武中葉之章雖始存終軼  
而此是彼非是知前之樂石足以訂來刻之譌昔之吉金亦可  
糾近鑄之失有裨于實學不少也近者圓石出洛陽而知王伯  
真爲附葬殘本藏太室而知堂谿典字伯非昨馮戶部敏昌遊